

西康建省記

地280.375  
941  
5-3



胡文伊敬贈

鹵康建省記

中華民國元年九月  
四川官印刷局排印

西康建省記序



開疆拓土乃版圖所關建省設官爲制度攸繫經營事蹟疆吏奏報史官纂修斯爲信而有徵乃可傳之不朽下焉者雖善不尊不尊不信矣蓋稗官外乘或以傳聞之誤或以擬議之辭或以好惡而論是非或以成敗而定褒貶信手著述任意低昂故不見正史之事君子不取焉今者西康建省六載乃成奏報雖多纂修尙待而界連西藏外人存窺伺之心地屬中原匹夫有維持之責疆理之原本對外交急於考查人民之蠢蠻對內政急於設施爰就目覩耳聞自始至末略記實事聊應急需俟大雅比事屬辭編成紀載俾賢者因文見義用布丹青此時據事直書文蕪義淺識者鑒原是爲序

凡例

一本記因宣統三年七月有改邊務爲西康省之疏故名曰西康建省記

一本記據事以書記事也非記人也然事因人而成記事不能不記人記人不能不臧否故於叙事之中微寓臧否之意然要皆卽一事而言未敢以一事而定人之美惡也

一記中之事悉與案牘相符間有出入者皆實事也并無臆度

一記中所指東南西北係就西康全部分而言如巴塘德格乍了等處所指四方雖就各部分而定仍以全部分爲標

準閱者察之

一記中於土司呼圖克圖之地則曰改流於野番之地則曰投誠於賞藏之地則曰收回以昭區別

一記中地名悉照奏案書錄以便查考



西康疆域記

西康古康藏衛三區之一也東自打箭鑪起西至丹達山止計三千餘里南與雲南之維西中甸兩廳接壤北踰俄洛色達野番與甘肅交界亦四千餘里其西南隅過雜瑜外經野番境數日程即爲英國屬

宣統三年春英人踰野番境在歷壁曲隔樹旌是年夏英國遊擊貝爾立由雜瑜取道野番境

回國均經邊務大臣趙爾豐電政府與英交涉在案西北隅昆連西甯番人常購俄國軍火東

南隅抵四川甯遠所屬各州縣之境東北隅乃四川甘肅之交幅幘遼闊倍于川等于藏清時爲西藏廓爾喀朝貢之道駐藏大臣出入之通衢曆代不知經營將地畀于酋長官爲土司而自治者十之五畀於呼圖克圖者十之一流爲野

三

番者十之三自清而賞給西藏者十之一光緒三十二年秋設邊務大臣漸將土司呼圖克圖之地改土歸流野番之地征討投誠賞給西藏之地如江卡貢覺桑昂雜瑜瞻對次第收回均奏明設官類伍齊碩搬多洛隆宗邊壩四部落亦以兵力收回之應由康設官仍舊以丹達山巔爲康藏分界則西康之疆域全矣

按康藏衛三區四川之打箭鑪以西丹達山以東爲康丹達山以西如拉薩等處凡達賴喇嘛所屬者爲前藏班禪喇嘛所屬者爲後藏藏卽唐古忒也藏之外乃爲衛今者衛已亡矣藏已與英人立有條約矣完全者僅一康耳譬

之藏爲川滇之毛康爲川滇之皮藏爲川滇之唇康爲川  
滇之齒且爲川滇之咽喉也豈第藏爲藩籬而康爲門戶  
已哉政府及川滇人士於藏固不可忽於康尤當念念不  
忘乃何以竟不知有康一出鑪關即謂之進藏殆以其語  
文風俗相同即視康爲藏耶抑以清時祇設駐藏大臣而  
無駐康大臣即統名爲藏耶以風俗論西甯金川亦與藏  
同而不得謂西甯金川爲藏以設官言西康毘連川省大  
小部落或有土司或有呼圖克圖自治其地歸四川統轄  
野番亦能安靖無須另設專官烏得以無駐康大臣而即  
謂康爲藏光緒三十二年秋政府知番地之不可不經營

也創設邊務大臣擇駐適中之巴塘卽駐康也康地在川  
滇之邊故名曰督辦川滇邊務大臣而未以駐康名者政  
府之誤也然亦誤於光緒三十一年川督錫良奏派趙爾  
豐往辦巴塘軍務不曰西康軍務而曰鑪邊軍務一誤再  
誤無識者更稱康爲藏恐數千里之康地將於無形中消  
滅焉地名之訛大有關係夫藏人受外人煽惑正欲藉此  
而兼併康地久矣光緒三十四年秋藏人呈請駐藏大臣  
聯豫代奏妄稱藏地直抵四川邛州經聯豫會同邊務大  
臣趙爾豐四川總督趙爾巽將原呈咨送政府聲明藏人  
心懷攜貳情形故趙爾豐出關極力經營康地凡有賞給

藏人部落漸次設法收回爲建省計蓋以英藏立有條約  
英人幾不以藏爲中國屬土而以藏爲一國嗾使藏人夜  
郎自大向之政令由駐藏大臣主持今之政令大半藏人  
獨行獨斷若達賴喇嘛得復政權則藏危矣藏危康與藏  
不分康必將不利恐繼英藏條約而起者不待立英康條  
約也康藏界限烏得不亟早分之况今之番人凡居丹達  
山以東者自稱爲康壩娃居丹達山以西者自稱爲藏壩  
娃出洋大臣胡維德將外人測繪西藏輿圖繙譯刻印圖  
中亦以丹達山爲康藏交界是番人與外國人皆能知康  
藏之畛域而中國人不知且有曾經游歷康藏者亦漫不

加察尙以甯靜山爲界夫豈知甯靜山乃巴塘江卡之界  
清以江卡一部落賞藏人江卡之外如乍丫察木多八宿  
等處尙非藏地甯靜山烏得爲藏界如瞻對亦曾賞給藏  
人者瞻對之東與單東連界瞻對之西尙有德格察木多  
等處豈得以與單東連界之處指爲藏界此理易明而愚  
者不察往往謬談然清之以地賞藏蓋由前代辦藏務之  
員迷信佛教將中國疆土奏請賞給達賴喇嘛但徒市恩  
一時而不知貽患後世今讀康雍乾年間藏務奏章諭旨  
令人太息幸近年已陸續收回康之上字完全故凡鑰關  
以西只能謂之西康丹達山以西乃可謂之西藏以定名



稱而正疆域

水

創設邊務大臣記

督辦川滇邊務大臣創設於光緒三十二年七月設大臣以辦西康事務故曰督辦亦猶西甯辦事大臣駐藏辦事大臣之類也然歷代之於西康番人皆以羈縻之術官其酋長茲何爲而設大臣哉蓋以川藏之故夫川之東南北皆有行省以爲屏藩四方瞻望惟此西顧之憂故藏雖距川六千餘里設有駐藏大臣兩員衷情章京一員廉俸則由川解矣驛站則係川設矣且藏地之拉里糧員前藏糧員後藏糧員靖西同知以及駐藏游擊都司守備千總把總外委兵丁亦由川省委任遣戍發給薪餉矣是西藏對於川省有關係故川省

對於西藏負責任而相距過遠形格勢禁聲息不靈往往藏中有事川省鞭長莫及以致釀禍於無窮如政府昔許英人入藏通商藏人梗命駐藏大臣兵單力薄無如之何川省亦籌備不及故光緒三十年英兵入藏而藏不能禦達賴出奔西甯中英交涉賠英兵費仍許入藏開設商埠藏事乃自此變更矣惟此西康界於川藏之間土宇廣大雖於打箭鑪設同知裏塘巴塘察木多設糧員并有副將游擊都司守備千把外委等官率兵戍之然皆爲驛站計何能裨於治理乎無裨治理又何有益於川省乎無益於川即無益於藏川人西顧則岌岌可危光緒三十一二年間戡定巴塘之亂蕩平裏

塘之匪乃患內而保衛四川外而應援西藏非於西康備糗糧整師旅不可於是屯墾練兵之故創設邊務大臣

按光緒三十二年簡放邊務大臣廷寄中諄諄以屯墾練兵爲急務其創設之意可知第康地尙未全體改流番人見屯墾而忌見練兵而疑且聞風阻撓執政者征討不遑而用款之間部吏又以遙度而限制困難情形筆所難述亦書不盡言惟其限制用款之嚴艱於措施擇必不得已之事而動款興辦樽節開支故部撥開辦經費一百萬六年支用報銷外尙餘三分之一至川省歷年所收油糖捐均存成都也

巴塘改流記

巴塘古之白狼國地方千里裏塘曲登在其東江卡三岩在其西雲南在其南德格在其北跨於金沙江之上有正副兩土司一宣慰一宣撫皆世襲其官分管其地清時屢次用兵西藏并有駐藏官兵故於巴塘設一糧員以川省同知通判知州知縣等官委任三年交替爲轉運糧餉計也又設有都司一員千總一員於距巴塘八十里之竹巴隴設外委一員由川省綠營中派弁兵往戍亦三年更替其喇嘛寺設堪布一名鐵棒一名爲僧官照漢官制三年任滿另換堪布一職以留學西藏通佛經曾爲藏中達賴喇嘛考驗取爲進士喇嘛者回籍之後遇有寺中堪布缺出由衆喇嘛公舉請糧員稟報四川總督委任之鐵棒一職係衆喇嘛擇其平素公正者推充之堪布掌管教務經典鐵棒管理僧人條規番人犯罪土司治之番人之喇嘛犯罪鐵棒治之文武漢官不能干涉惟番女之嫁於漢人者犯事歸漢官辦理其土司所轄地方征收糧稅亦納國家之賦然所納無多且由川省給與土餉除以賦銀相抵外年尙給銀千餘金故漢番相處無事光緒三十年駐藏幫辦大臣鳳全由川赴藏道經巴塘見地土膏腴即招漢人開墾乃番人迷信以爲神山不可動出而阻止鳳不聽於茨梨隴築墾場委巴塘糧員吳錫珍都司吳以

忠兼墾且鳳全所帶衛兵習洋操用洋鼓號番人疑爲洋官阻墾愈力土司堪布勸鳳速入藏以免巴塘生事鳳詈罵之益激番人之怒於是七村溝之百姓刦墾場殺墾夫羣起逐鳳漢兵寡不敵衆吳以忠陣亡外人教堂亦被燬并殺斃兩司鐸鳳逃入正土司寨內與番人議和番人詐許迫鳳回川鳳乃率隨員兵士東行吳糧員欲棄室相隨其妻聞之亦出而乘馬欲偕行被馬蹄傷墜地吳乃止鳳行數里至鸚哥嘴番人埋伏攻擊之官兵同死難惟吳糧員以未行得免兵士間有逃脫者皆良番庇匿之力也事後裏塘聞信乃報於打箭鑪轉報川督錫良奏派提督馬維騏建昌道趙爾豐督兵

攻剿趙爲後援鎮攝裏塘馬爲前敵直搗巴塘於六月十八日將巴塘克復擒兩土司而誅之趙爾豐於八月初間抵巴塘殺堪布喇嘛及首惡數人祭鳳全與兩司鐸因糧運不濟馬維騏率兵回川趙爾豐搜剿餘匪辦善後乃派兵剿七村溝救平後清戶口查地畝并移師攻鄉城光緒三十二年秋趙爾豐得授川滇邊務大臣川督派道員趙淵出關暫爲鎮懾趙爾豐回川籌商邊事乃會同川督錫良滇督丁振鐸具奏改流巴塘趙復奏設巴安縣光緒二十三年郵傳部尙書岑春暄亦有統籌西北全局之疏請將邊藏分建兩省光緒三十四年春趙爾豐授駐藏大臣兼邊務大臣秋間乃會同

川督趙爾巽疏改爲巴安府分設鹽井縣三壩通判各管地面并設康安道一缺駐巴塘奉旨交政務處議奏往返函商於趙宣統三年春乃議行惟巴塘南有得榮北有冷卡石負固不服於宣統三年春用兵取之奏設得榮委員將冷卡石併歸三壩

按巴塘肇亂土司堪布當番人圍攻鳳全之際尙出而彈壓番人不服副土司喉且受傷彼等見衆怒難犯始袖手旁觀然以不能彈壓僧俗擒而殲之迄今漢番人等猶爲太息正土司羅進寶之妻副土司郭宗隆保之子均移置四川成都惟正土司有存款數千由官發商生息分給兩

土司眷屬作善贍尙有罪人不孥之意存焉

裏塘改流記

裏塘昔屬青海清代仍官其酋長一宣慰一宣撫爲正副兩土司分土而治其地縱橫千餘里南接雲南維西廳及四川鹽源縣所屬土司之地北接毛了曲登東接明正瞻對西接巴塘清時設糧員一員由川委任管理轉運西藏糧餉事務并設守備把總二員又於火竹卡博浪工兩處設外委二員在川省綠營中派弁兵往戍文武官兵均限三年替換惟設官之處平原百里地寒不產百穀有喇嘛寺設堪布一名鐵棒一名光緒三十一年因巴塘之亂川兵往攻經過裏塘雇用烏拉正土司四郎占兌乃巴塘正土司之妻私生子故約

同副土司令頭人不支烏拉而糧餉不能轉運建昌道趙爾豐乃殺其頭人二名將兩土司管押糧乃運行趙率兵赴巴塘以副土司隨營押往正土司交裏塘糧員查竄看管勒令續雇烏拉乃正土司殺傷看管之官兵逃往稻壩貢噶嶺嘯聚土人爲亂趙爾豐由巴塘移師攻鄉城而稻壩一路之軍糧被土人截阻并刦殺官兵故由鄉城分兵剿之正土司敗逃入藏稻壩乃平而鄉城首惡喇嘛普中札娃強悍知兵昔年曾叛裏塘土司而獨立光緒二十年間誘殺裏塘守備李朝富父子川督鹿傳霖派兵討之而管帶官游擊施文明率兵前往爲番人攻敗生擒施文明剝皮實草以爲歲時逐崇

斬殺之具趙爾豐於光緒三十一年十一月派兵攻之鴈行  
頓刃兩月未克三十一年正月復親率大兵助攻該番抗拒  
大小數十戰兵匪互有傷亡匪退喇嘛寺死守礮堅牆厚大  
礮不能轟擊乃斷其水道圍之數月官兵糧食乏絕以包米  
牛皮煮草而食至閏四月番人以無水難支普中札娃已自  
縊乃作書派人縋城往求外援約於十八日夜間開城殺出  
送書者經官兵拿獲譯其書而知其情卽於十八夜攻之番  
人開城衝出被官兵鎗斃數百名生擒百餘名趙僅戮兇惡  
者三四人餘均准其投誠釋放諸番皆降鄉城乃定國家累  
年之恥乃雪惟裏塘正土司已先逃去地方應行改流秋間

趙爾豐簡放督辦川滇邊務大臣自鄉城赴裏塘將副土司  
由巴塘解回趙告之曰正土司四郎占兌叛逆逃颺地應改  
流汝爲副土司無大罪過改流之後另爲請汝世襲官職厚  
給養贍惟汝須遷居成都以免正土司之頭人等與汝爭競  
副土司已認允乃其妻疑慮不願遠遷用毒酒遣人送夫飲  
之彼卽私遁副土司死焉兩土司均無後副土司有一過寄  
母尙存由裏塘公款年給養贍趙爾豐護川督奏改裏塘爲  
裏化縣光緒三十四年秋復會同川督趙爾巽奏改爲裏化  
同知鄉城設爲定鄉縣稻壩設爲稻成縣貢噶嶺設縣丞宣  
統三年春始議准



### 德格改流記

德格在西康之北印文係德爾格忒西康諸土司部落以德格爲最大東連甘孜瞻對西連納奪察木多南連巴塘毛丫北連西甯俄落乃金沙江之上游地方數千里番人以其地大有天德格地德格之稱其土司係宣慰司職徵之譜牒相傳已四十七代矣光緒二十年間川督鹿傳霖派兵攻克瞻對議改流而統兵官張繼思啟封疆遂圖德格訪得德格土司羅追彭錯與其妻玉米者登仁甲生子名多吉僧格嗣以土司通於民間婦女其妻遂與頭人私通生子名降白仁青於是夫妻反目然其妻係藏女與瞻對藏官有姻誼藏官助

之抗其夫故各攜其子分居焉張繼乘衅計誘土司言爲之逐其妻及降白仁青乃率兵入德格將土司夫婦及其子押解四川成都經川督鹿傳霖疏將德格與瞻對一并改流後以駐藏大臣文海成都將軍恭壽劾鹿翻瞻對案德格亦與焉土司得省釋夫婦旋亦病故鹿具奏遣其二子回籍朝旨允以多吉僧格暫管地方數年後承襲土職降白仁青回籍業已爲僧繼而爭爲土司多吉僧格奔藏娶妻妾將於藏安焉而德格頭人百姓以降白仁青非土司之子且殘暴不願戴之赴藏迎多吉僧格回擁爲土司降白仁青見百姓不服已亦退讓相處數年乃有頭人正巴阿登等樹黨營私復曠

其爭職并誘佔多吉僧格之妾多吉僧格夫婦復奔藏控於駐藏大臣有秦張蔭棠事無成復爲德格百姓往迎之間且擒降白仁青而禁錮之降白仁青越獄脫逃聚黨爲亂多吉僧格挈眷避匿財貨被劫一空百姓被誅戮者亦衆適邊務大臣趙爾豐由川出關多吉僧格遣頭人至打箭鑪呈控經趙奏明率兵往辦於光緒三十四年十一月抵德格之更慶地方十二月攻亂賊於贈科賊竄雜渠卡其時雪深草枯烏拉難行官兵不能追剿賊等復猖獗肆掠百姓招之不降宣統元年四月趙特督兵往雜渠卡攻賊於麻木賊敗遁去千里至卡納之沙漠地方官兵尋追擊斃賊等多名餘始降降

白仁青亦竄入藏德格乃肅清多吉僧格夫婦遂請將德格改流懇於趙趙曰汝懇改流屢矣我不允者以乘人之危仁者不爲今德格救平矣汝勿慮我仍爲汝請襲土司之職土司泣曰救平者內亂耳德格地雖不毛窺伺者多且地廣人稀恐難守願請改流廣招漢人開墾使地闢民聚乃可圖強土司不才與其不保於將來曷若早圖於今日其意已決懇乞轉奏趙乃許之疏請將宣慰司之職改爲世襲花翎二品頂戴都司年給養贍銀三千兩將地分爲五區中區曰德化州南區曰白玉州北區曰登科府極北一區曰石渠縣東區之絨壩擦暫附中區西區曰同普縣又以德格居西康之北

與俄落色達野番接壤若野番歸化又須建置州縣故於登科設邊北道一缺以爲監司之官政府均議准行

按德格改流之後土司多吉僧格將所有更慶巽埡麥學三處房屋計值十餘萬金並有地畝草場番經刊板均於宣統二年冬納於官以易巴塘正司土充公之少數房屋一座草場數塊地土數十畝十二月杪遷於巴塘宣統三年春經邊務大臣趙爾豐奏明在案而多吉僧格並以所餘養贍銀一千兩及其妻妣郎錯莫首飾變銀一千兩捐作巴塘學費經趙請賞給頭品頂戴並予婦建坊奉旨允准在案

春科高日改流記

春科高日兩土司部落漏小在德格土司疆域之內春科百姓不及百戶土司故絕無嗣惟妻族一人同藏中派駐春科之堪布喇嘛治其民而征其賦高日百姓百餘戶有耕地有牧場耕地在登科金沙江之邊牧場在雜渠卡鴉龍江之旁其兩土司印信早爲藏中所派之堪布奪去藏人殆欲收其地土焉宣統元年四月邊務大臣趙爾豐督兵攻雜渠卡過登科查知其事乃飭藏中堪布將印繳出驅之回藏疏請改流其地春科土司無後免議襲職養贍高日土司改爲世襲守備職銜給與贍地兩土司部落併歸登科府石渠縣分管

孔撒麻書改流記

孔撒麻書兩土司居於霍耳甘孜地方距打箭鑪十日程清時設有麻書汎千總一員駐甘孜兩土司地土相連東有明正西有德格南有瞻對北有東科又與白利倬倭章谷單東各土司之地犬牙交錯麻書土司早爲頭人戕殺有妻無子孔撒土司無子有女女名央機招德格頭人贅門生二子長曰俄珠宜美其次子經喇嘛認爲呼圖克圖孔撒土司故後央機與孔撒頭人私通其夫殺孔撒頭人央機即逐其夫立長子俄珠宜美爲土司因與麻書土司係姻誼故兼襲麻書土司之職事在光緒三十年川督錫良爲之奏准在案然土

司俄珠宜美年幼其母理土司事有官兵經過其地輒聚衆抗阻光緒三十四年冬邊務大臣趙爾豐率兵赴德格道出甘孜央機母子聚衆匿於家謀抗阻嗣見兵多恐不敵乃止後以事洩畏趙興師問罪乃盡出其貲以購茶於宣統二年夏藉朝佛爲辭母子率土人百餘名起行入藏將以投藏也麻書汎千總報於趙趙卽派兵在途阻之乃棄茶逃匿後仍捕獲以兵管押之宣統三年春奏請改流其地并將央機母子監禁是年夏趙與邊務大臣傅嵩炘率兵至甘孜央機母子哀懇願出銀三千兩與辦學務用以贖罪免予監禁准之乃令本夫領之去并飭石渠委員孫毓英防營管帶朱憲文

阻獲央機母子之茶及貨物概行發還其麻書土司之婦給  
以贍地并以罰款銀給之令其生息以資養贍於是設甘攷  
委員道塢委員

靈葱改流記

靈葱土司在德格疆域之中人民數百戶地僅數村有郎吉嶺一村在昔施與德格巴邦寺喇嘛已經兩代後世土司欲收回其地彼此爭鬥宣統元年巴邦寺控於邊務大臣趙爾豐在登科行轅提訊係現在土司之祖母施與巴邦寺有約據今土司爭其地率衆劫郎吉嶺百姓牛馬百姓誓不歸土司故判令土司還其牛馬將郎吉嶺一村改流歸登科府管理奏明在案宣統三年春民政部奏准改流各省土司咨行辦理夏五月署川督趙爾豐會同代理邊務大臣傅嵩炆檄令靈葱土司繳印改流將地歸併登科府應給土司養贍官

職尙未議奏

白利改流記

白利距甘孜三十里部落編小在孔撒章谷倬倭疆域中宣  
統三年夏同靈烈土司一律繳印改流應給白利土司官職  
養贍尙未議奏



倬倭改流記

倬倭一曰朱窩皆番字之譯音土司之印信遺失其地界於章谷孔撒麻書東科之間人民百餘戶光緒二十年間川督鹿傳霖因章谷瞻對之事以兵討之同改流焉厥後瞻對還藏倬倭亦還土司宣統三年夏同靈葱白利一律改流將地方分撥章谷甘孜管理尙未奏請給予倬倭土司養贍官職

東科改流記

東科部落內接倬倭土司外連色達野番叢爾之區也土司印信遺失多年亦未承襲宣統二年夏川督趙爾豐邊務大臣傅嵩炆照民政部奏案檄令東科土司繳印改流該土司以木印呈繳印文係照原印翻刻多年者據稱東科原係喇嘛充土司然亦無從查考將地改流併歸甘孜管理應給養贍官職尙未議奏

章谷改流記

章谷距打箭鑪七日程其地插花與孔撒麻書單東瞻對倭倭白利德格均有連界之處羅科野番亦近在肘腋光緒二十年間章谷土司故絕其親戚等起而爭襲土職瞻對亦欲佔奪其地川督鹿傳霖派兵往攻之同瞻對倭倭一并改流嗣瞻對之地還藏倭之地還土司惟章谷土司乏嗣無人承襲故由川省委員管理光緒三十年川督錫良復奏章谷無人承襲改爲鑪霍屯設屯員一員隸於打箭鑪年征賦銀千餘兩作屯員及兵丁書役之費并分給喇嘛寺口食宣統三年夏代理邊務大臣傳嵩焮咨川督趙爾豐將鑪霍屯撥歸邊務管轄所有糧稅照改流各土司章程征收插花之地與甘孜互相劃撥截長補短使無參差惟鑪霍屯之稱番人不知仍應名爲章谷

單東改流記

單東土司一日革什咱土司印文則單東革什咱聯刻其地  
插花與明正瞻對麻書孔撒均連界瞻對且侵佔其地宣統  
三年夏同靈葱土司等一體改流於閏六月初旬繳印將地  
歸併道塢管理尙未奏請給予養贍官職

魚科改流記

魚科土司乃游牧番人部落小與單東卓斯昆連宣統三年夏川督趙爾豐邊務大臣傅嵩焘檄令之同靈葱土司等一體繳印該土司回稟支吾乘趙傅均往打箭鑪乃率馬隊至道塢山後遣人約道塢委員楊宗漢往見楊知該土司素性桀黠未往彼卽去嗣傅嵩焘返道塢復檄令繳印彼卽反抗傅派兵攻之并檄飭投誠之上羅科阻其竄路擊斃之將地併歸道塢管理俟查明子嗣仍請給養贍官職

卓斯改流記

卓斯部落與明正魚科連界人民數百戶宣統三年夏川督趙爾豐邊務大臣傅嵩林接民政部咨行奏准各省土司改設流官之案檄令卓斯土司繳印已稟復認繳其時趙已入川省傅亦返巴塘傅由巴塘批令該土司將印就近送繳打箭鑪廳并檄飭該廳催令速繳派員往查戶口糧稅乃議奏養贍官職將地方併歸道塢管理

按卓斯土司其印文係卓斯甲布查卓斯地名也番人稱謂如德格則曰德格家孔撒則曰孔撒家譯音誤家爲甲布者番人男子之稱也如德格家之男子則稱曰德格家

二十七

布茲以卓斯甲布爲地名誤矣

羅科投誠記

羅科野番也與章谷魚科瞻對相連部落褊小分上羅科下羅科有兩頭人互相讎殺歷久不解宣統二年鬥殺控於鑪霍屯員傳之質訊兩造彼來此去此來彼去不相對質已經年矣乃於冬間復聚衆滋事屯員會同防營前往彈壓下羅科抗拒傷斃官兵宣統三年夏川督趙爾豐邊務大臣傅嵩炘率兵至瞻對上羅科來投下羅科逃匿迄閏六月傅派兵攻魚科下羅科助逆經官兵擊敗及魚科投誠下羅科乃就撫焉傅以上羅科歸鑪霍屯下羅科歸道塢

納奪改流記

納奪土司在德格之西察木多之東人民數百戶耕者少而牧者多宣統三年夏因民政部奏准各省土司改設流官之案經邊務大臣傅嵩林囑德格土司改獎之世襲都司函告之繳印改流納奪土司卽將印攜帶赴瞻對呈繳因傅已同川督趙爾豐往打箭鑪該土司回籍秋七月傅嵩林回巴塘該土司遣其子將印信號紙於八月初間送巴塘呈繳已將地併歸同普縣管理應給養贍官職尙未議奏



沈邊冷邊咱里改流記

沈邊冷邊咱里三土司部落相連東自四川清溪縣之飛越嶺起西至瓦斯溝迤西交明正土司之界止計二百里皆三土司屬地清時設有都司把總等官率兵駐於飛越嶺山之陰守其關隘宣統三年春乃裁撤而鑪定橋舊設有巡檢一員隸於打箭鑪廳經營驛站其三土司地方風俗與漢人同蓋居近內地早已變夷爲夏也宣統三年夏趙爾豐由邊務大臣卸任來署川督經過其地查照民政部奏准改流土司之案將三土司印信號紙收回奏請將鑪定橋巡檢改爲縣其應給土司之養贍官職尙未議奏設治定後該處距四川

近仍應歸於川屬

巴底巴旺改流記

巴底巴旺兩土司俱宣慰司職其部落與懋功廳之屬地相連距成都近距巴塘較遠宣統三年西康各土司已照民政部之案改土歸流新設道塢委員楊宗漢令單東土司往說之兩土司卽先後將印送於楊轉繳邊務大臣傅嵩炆尙未設官亦未議奏應給土司養贍官職設治定後仍歸川屬

魚通改流記

魚通古地名也打箭鑪一帶皆稱爲魚通嗣各土司區分部  
落另更地名惟一小部落之名稱仍舊有一土司焉地居明  
正哨里之北宣統三年夏同明正土司等遵部案改流將地  
歸併打箭鑪管理西康建省後川康於折多山頂分界打箭  
鑪仍應歸川

明正改流記

明正卽打箭鑪之上司打箭鑪卽古之旄牛國也查西康各土司如德格巴塘裏塘皆以地爲名稱而打箭鑪土司其印文曰四川長魚通河西宣慰使司印然未稱爲河西土司而稱爲明正土司川督奏疏中久已如是其明正之義未詳或謂前土司恭順昔爲川督奏請獎以明正故以明正稱未知是否然考之番人未稱之爲明正聞人稱明正且不識其爲誰也其土司居於打箭鑪所管部落縱橫千餘里東自咱里土司之界起西至鴉龍江裏塘土司之界北南則越舊廳毗連北則章谷屯接壤其四隅與各土司連界之處尙多惟所居之打箭鑪天氣寒冷百穀不生四面皆山地方狹小中有小河水勢洶洶商賈傍河兩岸結爲市廛而貿易焉清時設同知一員屬於雅州府管理轉運西藏糧餉事務設有副將一員及都司千總把總外委各官率兵鎮守其地蓋漢番通商之埠出入征稅之關也故自打箭鑪西行則曰出關打箭鑪東行則曰入關光緒之中改同知爲直隸廳不屬雅州府光緒三十四年秋邊務大臣趙爾豐會同川督趙爾巽奏改打箭鑪廳爲康定府宣統三年夏趙爾豐簡署川督會代理邊務大臣傅嵩林查照民政部奏准各省土司改流之案同至打箭鑪令明正土司甲木參瓊珀繳印改土歸流曾經入

奏尙未議給土司養贍官職及分設州縣

按明正土司改流地方遼闊應將毗連裏塘之地劃歸河口毗連孔撒之地劃歸道場其他九龍鹿麋章谷等處應設縣官若西康建省與川分界應在打箭鑪迤西之折多山頂山以西爲康山以東爲川打箭鑪之名稱仍舊不用康定府名義免與西康相混

泰凝改流記

泰凝一日泰甯距打箭鑪三日程清時設把總一員駐其地有一喇嘛寺昔爲西藏達賴喇嘛降生之所其寺故歸藏屬寺中喇嘛由川中按年給口食銀千餘兩康雍年間川督令明正土司撥地數段及土民八十餘戶爲該寺供役給予執照在案現已及百餘戶不屬土司而屬於喇嘛焉其地產沙金光緒三十年商人由川省礦務局稟請轉報川督錫良飭打箭鑪廳同知劉廷恕准令商人採辦劉廷恕稟覆恐番人阻撓滋事川督嚴批飭令遵行並派弁兵前往彈壓乃甫經開辦泰凝寺喇嘛率番人梗阻並殺斃都司盧鳴颺瞻對藏官亦暗助泰凝寺爲亂錫良委派提督馬維騏率兵討之乃救平宣統三年閏六月代理邊務大臣傅嵩焘以諸土司業經改流惟此泰凝應歸一律乃令藏中駐泰凝寺之堪布將從前所領川督執照繳出咨川銷燬該喇嘛應領銀兩仍照舊發給然地雖改流應撥歸何屬管轄尙未議定

俄落色達投誠

俄落色達係野番部落在德格東科章谷各土司之北懋功廳之西其西南與甘肅西甯之地相連區域遼闊縱橫四千餘里不產百穀森林亦鮮番人皆游牧逐水草而居以牛毛作帷幙無城郭碉堡飲酪食肉以糞代薪其附近德格土司之地者爲俄落分上中下有三頭目間購有俄國軍火宣統元年春德格逆匪降白仁青等據維渠卡爲亂邊務大臣趙爾豐檄飭俄落野番毋許助逆夏五月趙率兵攻維渠卡逼近俄落邊地僅一日程又諭令該野番投誠不准劫掠乃回稟支吾趙擬臨之以兵但輸粟輓薪在在維艱且該番居無

廬舍遷徙鳥舉難得而制旋據該野番頭目復稟承認約束百姓永不劫掠趙藉此止兵宣統二年德格葛察寺喇嘛往說俄落投誠宣統三年乃漸次投石渠縣而納稅至附近東科之色達宣統三年五月邊務大臣傅嵩炆同川督趙爾豐率兵至甘孜該野番來投數十戶趙傳檄令全體投誠旋亦承認但來呈要求免於境內駐兵免其認雇烏拉每年只納牲畜稅三千元等語傳批令應與改流各土司之地一律不能歧異閏六月色達仍遵批承認來請告示章程皆與之並派甘孜委員寇卓率兵一隊往查其地造丁口牲畜清冊自是而色達投誠俟俄落全體投誠後即建治設官焉惟俄落

色達地廣人稀擬各就適中之處建設縣治一名曰俄落一  
名曰色達



瞻對改流記

瞻對距四川打箭鑪七日程東連明正單東麻書孔撒章谷五土司之界南接裏塘毛丫崇禧三土司之疆西北與德格土司毘連縱橫數百里爲鴉龍江之上游有上瞻中瞻下瞻之分名曰三瞻原有五土司清之咸豐年間爲土司工布朗結一人兼併其工布朗結之爲人陰鷲多很有併吞西康東抗四川西距西藏之心康地各土司或割地或貢賦莫不俯首帖耳而聽命同治初年藏人由打箭鑪購茶運回道經康地被工布朗結劫掠藏人怒求駐藏大臣具奏川藏派兵會剿奉旨允行其時督川者爲駱秉章適川有石大開之亂不

暇兼顧而藏已率兵東來各土司羣起助藏駱料瞻對不支敗必投藏始飛檄止藏兵藏不聽駱卽派史道員率兵徂西會攻史至打箭鑪畏葸不前俟藏兵克瞻誅工布朗結父子史乃往收其地藏人索賠兵費二十萬金史報於駱駱以府庫空虛未允藏卽索其地駱爲之奏明瞻對遂歸於藏由藏派民官一僧官一率兵鎮撫之官兵均限三年替換所派之官由藏中達賴喇嘛及管事之商上選定咨請駐藏大臣奏明乃能赴任惟藏官到瞻暴斂橫征且仍照工布朗結佔各土司之地并索供駐瞻兵費垂三十餘年瞻民苦之於光緒二十年間遂殺藏官而自立旋經川督鹿傳霖派兵攻克之

議改流其地斯時之瞻對藏失之川收之藏雖欲爭無詞可措縱使相爭川亦可索賠兵費乃駐藏大臣文海成都將軍恭壽與鹿不睦密會劾鹿將瞻對仍舊給藏說者謂自此瞻對不爲康有矣光緒三十四年冬邊務大臣趙爾豐由川出關赴德格沿途土司百姓紛紛呈訴謂瞻對藏官佔奪其地且年索兵費所帶藏兵千餘四路貿易絡繹不絕概令百姓支差不給差費復索供給并誣損壞貨物勒令賠償受害難堪懇求保護趙憫其苦檄飭藏官令其但管瞻對不得騷擾各土司百姓而藏官回稟歷述藏中勢力且暗欲率兵攻趙趙派傅嵩林率兵赴昌泰扼之并電政府擬逐藏官收回瞻

對政府議緩其時鹿傳霖亦在樞密一人不能爲力宣統元年春趙又電政府收瞻對政府議以拾餘萬金與藏贖令駐藏大臣聯豫溫宗堯告知藏人藏人不遵反藉外人以爲囑喝其居心殆欲藉瞻對爲基礎以吞滅康地耳宣統二年春趙仍以收瞻事電政府政府盲於事情恐驚外人釀交涉仍不決而各土司受藏官之害鳴冤不已宣統三年夏趙調署川督傅嵩林代理邊務大臣而趙以瞻對屬藏終爲西康之禍亦非川省之福就入川之時同傅率兵親入瞻對於六月逐其官撫其民收其地召集百姓公議改良賦稅之則設官治理遠近番人歡欣鼓舞惟藏人迭請駐藏大臣聯豫咨文以

爭瞻對經傳駁之趙蒞川督任乃將收瞻事入告於是瞻對  
仍歸西康設治

按瞻對始末各事川康藏均有案可考鹿傳霖有籌瞻疏  
二冊言瞻事甚詳

三岩投誠記

三岩野番居德格之南江卡之北貢覺乍丫之東巴塘之西跨於金沙江之上有上岩中岩下岩之分自東至西僅二百餘里自南至北計四百餘里無土司頭目管束各不相下或數十戶爲一村或百餘戶爲一村不相往來各村亦常互鬥一人有讐同村爲之報復歲時與漢人不同與番人亦異自耕自牧草場地畝疆界甚嚴且以行劫侵毆爲業各屬番人及往來商旅無不畏之惡之清時屢以藏事出兵不由三岩捷徑而繞道五六日程由江卡者以三岩地險人強難於收服之故也昔年乍丫江卡貢覺遭其劫殺合兵攻之大敗而

還死者數千嗣三岩復劫大道光緒二十年間川督鹿傳霖派夏提督及統領韓國秀率兵并調巴塘江卡土人往攻之兵至下三岩卽被野番圍困乃議和予以茶包始得退兵并割巴塘土司白獎工地方一段與之又爲之請獎土千總土把總兩職年給土餉銀數百兩以羈縻下三岩之喇嘛數十戶藉以寢事而野番劫搶如故藏商屢遭其害光緒三十四年藏人以兵攻之經年不克亦僅下三岩與之利息該野番勢焰愈熾宣統二年劫奪官兵快槍捆去官弁毆傷放回邊務大臣趙爾豐乃派人查考地勢偵探路徑半年之久得悉其情先以告示諭之投誠野番回書令官兵投之否則相戰

以決勝負嗣趙由察木多移駐乍丫而乍丫江卡番人紛紛  
懇攻三岩且謂三岩不取各處不安難納糧稅其意殆藉三  
岩之勢以爲抗糧地步惟時適有鄉城兵變之事一面派兵  
追剿叛兵一面奏派傅嵩焮率兵攻三岩十月初旬兵分五  
路約期進發該野番地雖險阻首尾不能兼顧官兵竭力猛  
攻旬日之間卽入巢穴官兵傷亡數十名野番死者亦衆乃  
詣軍前乞降全岩肅清宣統三年春趙爾豐疏請建設流官  
焉

按三岩野番性慷慨無狡詐刦搶之事直認不諱畏刑而  
不逃刑可以縱囚歸獄有太古之風焉

江卡貢覺桑昂雜瑜收回記

江卡貢覺係蒙古人迄今土人尙存有元代制誥乃蒙文與藏文異桑昂雜瑜係野番投誠者清初時川兵進藏多取道於桑昂設有台站弁兵後乃併歸乍丫雜瑜之外尙有野番乃與英國屬地交界焉之四部落地本相連廣袤千有餘里雲南怒江爲之南三岩乍丫爲之北巴塘鹽井爲之東察木多八宿波密爲之西清時以之賞藏只於江卡設守備把總外委各員率兵戍之爲進藏驛站計藏中派官分駐江卡貢覺桑昂徵其糧賦宣統元年川省派陸軍入藏藏官調集各處土兵數千在江卡攔阻經邊務大臣趙爾豐派員開導之不聽乃商川督趙爾巽電政府改道由德格察木多以避江卡之藏兵並派邊軍爲前驅護送陸軍往江達乃江卡藏兵卽欲乘虛犯巴塘勢燄甚熾趙乃分兵驅之藏兵潰散宣統二年春疏將其地收回并議與藏人於江達劃界朝旨飭駐藏大臣聯豫查覆聯以爲不可且據藏人之呈迭次咨請仍將江卡等處給藏趙乃率兵赴貢覺傳給各處頭人百姓詢其願歸何處均稱藏官苛虐甘願改流於是爲之設官徵收糧稅宣統三年春趙復具奏得旨准照辦故分江卡貢覺桑昂雜瑜四區而設官焉

乍丫察木多改流記

乍丫察木多部落昆連東接德格納奪貢覺西連八宿洛隆宗康藏交界之丹達山亦有察木多歐脫地乍察合計地方千有餘里係清賞時給兩處呼圖克圖管理自征糧賦并不納於國家但三年一期貢而已其呼圖克圖圓寂衆喇嘛卜於神考其降生何方前往查訪或三四年五六年後得其靈異幼子卽以前生所用器皿十餘事參以同樣者試之能辨故物卽認爲轉世而稱爲呼圖克圖呈請駐藏大臣入奏轉世仍管地方是乍丫之呼圖克圖猶之乍丫土司察木多之呼圖克圖猶之察木多土司惟土司係以子承襲呼圖克圖

係轉世耳清時於乍丫設有守備把總外委率兵戍之爲進藏驛站計察木多又名昌都亦設有游擊千總把總外委率兵鎮戍之設有糧員一員管理轉運駐藏官兵糧餉不與民事宣統元年春駐藏兼邊務大臣趙爾豐奏請銷去駐藏之任專任督辦邊務奉旨允准駐藏大臣聯豫將察木多乍丫奏歸邊務大臣管轄是年冬川兵進藏藏人梗阻趙爾豐率邊兵護送至察木多并派兵送川兵至江達其時番人畏趙之威八宿三十九族波密來投類伍齊碩搬多洛隆宗邊壩四部落用兵討降均願改流趙一一撫循之告以奏明辦理故宣統二年春趙奏請於江達劃分邊藏界限奉旨飭駐藏

大臣聯豫查覆其時趙擬改流察木多乍丫因藏事未定特  
緩之夏間趙由察木多赴乍丫將呼圖克圖暴斂橫征等事  
勒令改良番人悅服請於乍丫設官管理詞訟允之又以乍  
丫番人光緒三十年入藏圍攻駐藏大臣罰之出房贖罪爲  
衙署焉并飭察木多呼圖克圖將糧稅一律改良即預爲改  
流地步也宣統三年春始奏設乍丫察木多理事官奉旨允  
准是年夏西康各土司全體改流代理邊務大臣傅嵩炆檄  
飭乍丫察木多兩處呼圖克圖繳印因驗印文係闡講黃教  
故發還之但飭理事官清查丁糧將每年征入之款分一半  
給呼圖克圖以一半作行政官經費其呼圖克圖仍准轉世

屆時具奏永免朝貢



八宿改流記

八宿在察木多之西係呼圖克圖管理其地與察木多乍  
相同宣統元年冬邊務大臣趙爾豐駐察木多八宿僧俗頭  
人來見請設流官已准之惟尙未設官征收糧稅焉

類伍齊碩搬多洛隆宗邊壩收回記

類伍齊碩搬多洛隆宗邊壩四部落在察多木八宿以西丹達山以東康藏原係丹達山分界之四部落係屬康地與藏昆連清時以之賞給藏人然爲入藏通衢故於碩搬多邊壩等處設有千總把總外委各官率兵駐紮以爲驛站宣統元年冬川兵入藏藏人令四部落番人梗阻川兵繞道由二十九族而往邊務大臣趙爾豐即派邊軍直向大道轉戰前進類碩洛邊番人敗潰投誠且爲邊兵購運糧秣因時屆隆冬雪深草枯牛馬乏食倒斃甚衆趙聞而憐之於宣統二年春奏撥款項派察木多糧員劉廷瀨前往清查按價賠償番人

悅服趙爾豐并奏請與藏人在江達劃界俟界定後即設治焉而駐藏大臣聯豫乘邊兵收服四部落即派員駐碩搬多充理事官此四部落原屬康地雖清時以之賞藏今而阻我川兵已成叛逆邊務大臣以兵戡定收回仍應歸康設官於碩搬多邊壩

三十九族附

三十九族與西甯相連原係白餘族撥歸西甯管轄數十族以三十九族歸駐藏大臣管理并非藏地宣統元年春邊務大臣趙爾豐駐德格時三十九族即遣人赴德格來投是年冬趙詣察木多該番復來請歸務邊大臣管理趙已電奏在

案惟尙未設官耳

波密投誠記

波密部落界於康藏之間與白馬崗野番毘連自稱係漢人苗裔土人相傳乃從前進藏之兵因無餉而流落於此與番女配子生孫而孫又生子自成一部落焉光緒三十四年春趙爾豐護川督時奉旨授爲駐藏大臣兼邊務大臣率師入藏因聞波密係漢人之後遣守備楊德修招之爲兵波人不願當兵故仍由川招募宣統元年春趙爾豐奏請銷去駐藏之任專辦邊務而駐藏大臣聯豫乃奏調鍾穎率川兵入藏藏人梗阻趙率邊兵護送川兵是年冬趙至察木多波密人來投稱前代原係漢人仍願歸漢趙嘉其順允之并重賞之

去特商駐藏大臣聯豫聯恐波密改流藏人疑慮求外人保護反惹交涉應緩辦宣統二年春波密人以其地所產之棉所種之糧所織之布復來呈驗於趙以實其確爲漢人之據并詳述其地之疆域與白馬崗相連白馬崗之外有野人野人之外卽英國屬地請早於波密設官保護人民地土但不願歸藏等語趙以聯豫有藏人疑慮之說乃告波人靜候奏明辦理仍遣之去聯豫聞波密樂於就撫於宣統二年冬派兵往招之波密不降宣統三年春添兵攻之夏四月鍾穎兵敗而退全藏震驚聯電政府及川督乞邊務大臣派兵救援趙乃商於代理邊務大臣傅嵩林電奏派統領鳳山由巴塘

率邊兵二千往援聯豫亦另派參贊羅長禡率兵會同邊兵  
進攻乃克波密并取白馬崗而邊藏均欲佔領其地聯乃具  
奏聲明改流之後歸藏歸邊另行議奏云

邊務大臣辦事記

清之光緒三十二年丙午七月設督辦川滇邊務大臣命趙爾豐充之先是光緒三十一年乙巳春駐藏幫辦大臣鳳全路過巴塘被番人戕害四川總督錫良奏派建昌道趙爾豐會同四川提督馬維騏往征趙於夏四月下旬由成都起程赴建昌道任五月初九日自雅州前進至打箭鑪籌備軍糧包裹軍火六月十六日出關經河口二十七日抵裏塘因糧運不濟烏拉掣肘八月初八日始至巴塘其時馬維騏已於六月十八日克復巴塘矣趙爾豐至接辦善後馬卽回川九月趙派兵剿辦倡亂之七村溝并搜擒各處餘匪巴塘戡定

惟南之得榮浪藏寺北之冷卡石未投姑置之十月查戶口糧賦派傅嵩林征收十一月委員赴鹽井設局征收鹽稅又以裏塘屬之鄉城桑披嶺寺昔戕官弁稔惡不法派兵攻之不克次年正月趙爾豐率兵隊進攻於閏四月十八日克鄉城殲番匪之渠魁雪邊吏之宿恥并攻克同惡之稻壩貢嘴嶺一律肅清旋即奉旨充川滇邊務大臣八月中趙爾豐由鄉城稻壩至裏塘將裏塘土司改流乃以所部防軍五營分紮裏巴改流之地以創辦川滇邊務應需經費必商川滇兩督乃於九月由裏塘入打箭鑪十月初至成都面商川督錫良電商滇督丁振鐸會陳條件請撥的款十二月鹽井腊翁

寺爲亂趙爾豐電令防兵攻克之三十二年丁未正月趙將返邊地而奉旨護理川督卽在護督任內兼辦邊務修建關外旅店招募農民開墾奏派吳嘉謨辦學務延聘美國人勘金礦且興製革於巴塘僱洋技師往驗水性建鋼橋於河口僱工洋師往測橋基并延日本農技師提倡農業於西康矣委員出洋調查織絨機器磨麪機器矣延醫人購藥餌出關設局矣奏設裏化縣定鄉縣巴安縣并將西康應興應革諸大端次第奏陳得部撥開辦經費一百萬兩三十四年戊申正月簡放爲駐藏辦事大臣兼邊務大臣電請收回成命未允五月十八卸護督任七月會同川督趙爾巽奏設康安道

改打箭鑪爲康定府設河口縣裏化廳同知稻成縣貢噶嶺縣丞巴安府三壩廳通判定鄉縣鹽井縣并招募西軍三營挑選旗兵八月初十日由成都督師西行九月二十二日至打箭鑪因德格土司之事奏明往辦十一月初六日出關經秦凝道塢章谷倬倭麻書孔撒白利絨壩擦玉龍濯拉擴絡塚等處百姓控瞻對藏官騷擾乃檄飭藏官毋得滋事至二十三日抵德格駐更慶十二月派兵攻亂匪昂翁降白仁青等於贈科匪竄雜渠卡宣統元年己酉正月瞻對藏官調兵欲來犯趙爾豐派傅嵩林於正月十三日率兵赴昌泰扼之乃止四月十九日趙督師攻雜渠卡五月初四日戰於麻木

匪敗逃六月十一日派兵追匪十日程至卡納一戰而匪降  
德格肅清土司請改流其地乃招集百姓議定賦稅則八月  
二十二日回至登科九月改流春科高日兩土司及靈惹土  
司之郎吉嶺一村均具奏并奏設收支局奏鑄銅元出關行  
使又渡金沙江巡閱春科地方十月初八日回德格更慶適  
因川兵入藏藏人梗阻於察木多以西劫軍糧擄軍官趙爾  
豐得報於二十二日率邊軍兼程而進經崗沱渡金沙江由  
楸工同普越雪山二十八日抵察木多派邊軍護送川兵入  
藏三十九族來歸邊波密來投誠八宿請設官均拊循之去  
並派兵驅剿類伍齊碩搬多洛隆宗邊壩阻路之番人又分

兵取江卡貢覺桑昂雜瑜咸收服之宣統二年庚戌正月邊  
軍越丹達山以西直抵江達以爲川軍入藏之聲援趙爾豐  
奏請與藏人於江達劃界又奏設邊北道登科府德化州白  
玉州同普縣石渠縣五月邊軍自江達回察木多六月初四  
日趙爾豐率兵赴乍丫初七日至其境下旬巡閱乍丫煙袋  
塘審理民間詞訟七月二十五日返乍丫改良呼圖克圖賦  
則八月巡閱阿足霜災旋回設乍丫委員適以定鄉兵變派  
統領鳳山追剿之九月三岩野番投書索戰趙爾豐於九月  
二十一日率兵赴貢覺十月奏派傅嵩林督兵攻三岩一旬  
而克十一月設三岩委員十二月清查貢覺丁糧設貢覺委



員趙爾豐卽東行於除夕前一日至巴塘宣統三年辛亥正月試驗巴塘番學生復奏撥學費并報戡定三岩事二月以巴塘屬之得榮浪藏寺數年不服派兵攻克之設得榮委員並取服冷卡石三月二十三日趙爾豐奉旨署理四川總督四川藩司王人文開缺充督辦川滇邊務大臣趙爾豐奏請收回成命未允四月初六日趙爾豐電奏請以傅嵩焘代理川滇邊務大臣初七日奉電旨允准初八日趙爾豐交卸邊務大臣仍會同代理邊務大臣辦改流土司並收回瞻對事務

清之宣統三年辛亥四月初八日代理邊務大臣傅嵩焘接

任初九日同署川督趙爾豐自巴塘起程經白玉絨壩擦審訊案件五月初九日至孔撒麻書設甘孜委員並會檄靈葱白利倬倭東科單東魚科明正各土司繳印改土歸流色達及上羅科野番來投其時駐藏大臣聯豫電請邊兵攻波密趙傳會奏派副都統鳳山率兵二千前往五月二十八日趙爾豐傳嵩焘率兵自甘孜行六月初二日至瞻對逐去藏官收回地土設瞻對委員集百姓議征糧之事十二日由瞻對行十五日同抵道塢十六日以道塢設官理由集百姓而告之十七日同行二十日至打箭鑪會檄魚通卓斯各土司繳印改流二十一日傳集打箭鑪百姓剴切開導改流事宜二

十二日趙入川沿途收哨里冷邊沈邊三土司印傳駐鑪辦理明正改流興革各事二十九日傳嵩焮復出關經秦凝改流其地閏六月初三日至道場因魚科土司抗不繳印且結下羅科叛亂故以兵攻之并令投誠之上羅科扼其險要擊斃魚科土司其百姓同下羅科投誠於是傳嵩焮奏請建設西康省二十二日傳由道場行經八美中谷過納貢寺東俄洛高日寺臥龍石八角樓二十七日至河口閱橋工越日行七月初二日至裏塘而崇喜土司之印已繳與裏化廳陳廉矣惟毛丫曲登地雖改流征糧稅尙未繳印檄飭呈繳復稟請緩姑准之七月十二日傳嵩焮由裏化西行經三壩大朔

十六日抵巴塘而納奪土司旋來繳印八月傳檄飭乍丫察木多兩呼圖克圖將印呈驗改流其地均遵行飭由理事官查收糧稅自此西康之全局底定傳嵩焮已於巴塘修建衙署矣由創設邊務大臣之年計已至六年若以巴塘軍興之年計已至七年爰將辦事始末述而爲記

按宣統三年八月二十四日奉王人文著撤去侍郎銜開去川滇邊務大臣趙爾豐著仍充川滇邊務大臣四川總督岑春暄未到任以前所有川中剿撫事宜仍著趙爾豐懷遠疊次諭旨飭各軍迅速辦理不得意存諉卸致誤事機欽此查此旨係電傳而西康與四川自七月十六

日已文報不通並未得電後數月始於滬報見之特附錄  
備考

代理川滇邊務大臣傅嵩林奏請建設西康省摺

奏爲統籌邊地大局擬請建設行省恭摺具陳仰祈 聖鑒  
事竊查邊地界於川藏之間乃川省前行爲西藏後勁南接  
雲南北連青海地處高原對於四方皆有建瓴之勢非特與  
川滇輔車相依而已因鄙陋在夷我朝版圖式廓未及經營  
僅以羈縻之方官其酋長作爲土司俾之世守以數千里之  
地分二三十部落皆同封建之規雖有朝貢之名而無臣服  
之實如咸同年間瞻對土司工布朗結併吞五土司地土夜  
郎自大頑梗跳梁其地卒爲藏人奪去於是各處土司喇嘛  
只知有西藏不知有朝廷光緒二十年以來鄉城則據邑而

抗殺將官乍丫則入藏而圍攻欽使泰凝以開礦而拒斃武  
弁巴塘以墾地而戕害大臣叛亂疊興屢煩兵力光緒二十  
二年裏巴兩塘經建昌道趙爾豐戡定朝廷注重邊疆爲長  
治久安計特簡趙爾豐充邊務大臣鎮撫其地以軍府之責  
管理地方規制以殊但蠻荒甫闢其時又僅裏巴改流郡縣  
無多係屬權宜辦理然邊地遼闊或曾有土司或尙屬野番  
蠻族錯居爭鬥角逐民不聊生趙爾豐乃力圖改革光緒三  
十四年奏請驅剿德格逆匪宣統元年肅清德格土司即請  
改土歸流高日土司亦相繼而起森科土司故絕無後曾經  
一律奏明改流同裏巴等處僅擇衝要繁庶地方奏設道府

廳州縣十餘缺宣統二年收回江卡貢覺桑昂雜瑜等處奏  
明派委員管理三岩野番亦經剿平設治宣統三年收服得  
榮冷卡石并改流麻書孔撒兩土司察木多乍丫亦改設理  
事官瞻對現已收回又奉民政部行文本年二月奏准各省  
土司改設流官行令辦理趙爾豐適因奉旨署理川督由邊  
入川即將靈葱白利倬倭東科明正魚通咱里冷邊沈邊等  
九土司概予改流此時關外未改流之士司數名未投誠之  
野番數處臣已陸續辦理就緒總計地面已奏定府廳州縣  
者十餘缺已奏設官而未定府廳州縣者十餘處近日改流  
及從前應行添設郡縣之處猶多已成建省規模而星使非  
嘗設之官形同寄處亟應及時規畫改設行省俾便擴充政  
治底定邊陲查邊境乃古康地其地在西擬名曰西康省建  
設方鎮以爲川滇屏蔽藏衛根基雖建省之事關係重大非  
臣所敢輕議而光緒三十三年郵傳部尙書岑春暄有統籌  
西北全局之奏即請改邊地爲省奉旨飭議以其時番人頑  
梗未識兵力能否蕩平趙爾豐未敢操切議覆幸承朝廷威  
德拊循諸番諭以明詔彰善殫惡百蠻嚮風建省之計惟此  
時爲然臣在邊六年既有所見不敢緘默謹將管見所及暨  
應行建省各節繕單臚陳仰祈採擇所有統籌邊地大局擬  
建行省緣由是否有當伏乞皇上聖鑒訓示謹奏

謹擬邊務應改行省條陳繕單恭呈

計開

一邊地與西藏昆連西藏與強鄰逼處外人狡焉思啟封疆幾不以藏爲中國屬土殆因藏未建省名義未定之故茲邊地卽係康地康藏原有攸分應將疆界照舊劃定以康建省俾定名義而占領地土此應建省者一

一邊地未開辦以前藏距川遠藏人時有不軌之謀光緒二十九年西藏有洗漢人之議三十年午午率兵入藏圍攻駐藏大臣及英兵入藏漢官亦受制於外人藏人愈以中國爲不足恃遽萌攜貳之心三十四年聞駐藏大臣兼邊

五十九

務大臣趙爾豐督兵入藏藏人卽起而梗阻且呈稱藏地直抵邛州宣統元年川兵進藏藏人又斷駐藏大臣供給沿途攔阻入藏之兵倘非邊地早有布置派邊兵護送川兵前進大局何堪設想卽如本年夏間波密猖狂駐藏之兵敗退若非就近有邊兵接應藏人必致附和將邊地改設行省編練重兵建成卽可銷萌守康境衛四川援西藏一舉而三善備此應建省者二

一邊地東自打箭鑪起西至丹達山頂止計三千餘里南抵維西中甸北至甘肅西甯計四千餘里應設州縣八九十缺若無一定行政總機關措置失宜又釀後患川督距遠

不能遙度情形遇有變故徒事鋪章糜費帑款不可勝計  
此應建省者三

一 邊地所設府廳州縣各管地面皆地足以養民民足以養  
官所征糧稅可敷各屬員司廉俸辦公之用此應建省者  
四

一 建省之後應設長官卽將原有之邊務大臣收支局學務  
局康安道邊北道更改名目所有廉俸公費照原有薪公  
分別定明無須增加事舉而款不費此可建省者五

應改名目如左

一 邊務大臣改爲西康巡撫

六十

一 原設邊務收支局改爲度支司

一 原設關外學務局改爲提學司

一 原設康安道改爲提法司

一 原設邊北道改爲民政司

以上各官廉俸公費邊務大臣向由川省撥解其餘係  
由邊務經費項下開支建省之後卽由四川解款項下  
支給查四川解款邊務大臣年支公費銀三萬兩新軍  
五營西軍三營礮隊一隊衛隊二百名遇閏之年山川  
解銀三十五萬餘兩又轉運費銀五萬兩又裏塘巴塘  
乍丫江卡察木多等處台兵裁撤將原數銀兩全行解

邊計銀六萬餘兩每年共解銀四十九萬餘兩又川省  
奏抽油糖捐年計銀五十餘萬兩總共計銀百萬兩之  
譜建省後仍請飭四川以壹百萬兩爲定額分春夏秋  
冬四季於正月四月七月十月每期解銀二十五萬兩  
以作練兵行政驛站辦學之費  
以上各條係就康地應建行省而擬其設官辦事章程  
將來另擬分別奏咨核辦

查此摺係宣統三年閏六月十六日由邊務大臣行轅  
驛遞成都請川督專差送京已得川督回電於七月十  
二日收到未知何日專差前送後因文報不通未奉硃

批



西康山記



天下名山三百支山三千小者無算此九州之山也而西康之山不與焉然康境之山亦多矣終年積雪人跡不能到者山雖高而無名統而名之曰雪山無地無之其人力所通之處山上有道路者番人名之曰拉無道路者名之曰熱猶華人以山之有穴者名曰岫出脊者名曰岡大而高曰嵩小而高曰岑銳而高曰嶠卑而大曰扈之類也康爲川藏通衢沿途大山與西川交界者曰折多山自此前進則有高日山博浪工山三壩山大朔山甯靜山昂地山王卡山恩達山瓦台山與西藏交界者曰丹達山此數山者盛夏之時天陰則雪秋冬及春有時大雪封山不能行路清時驛站摺報亦有阻雪之日此指大道而言也小路之山如甘孜赴德格之濯拉德格赴昌都之熱埡巴塘赴鹽井之覺隴白玉赴德格之恩作拉登科赴石渠之恩科亦高而積雪者此外尙多不能歷數惟皆登高一覽衆山俱小矣

西康河記

北條之水河為總南條之水江為大此夏禹所導之水也西  
康之水則為禹迹所未經地處高原山多水少水勢就下從  
無汎濫之患打箭鑪之外河口縣有鴉龍江發源於青海與  
德格土司屬地之雜渠卡即今之石渠縣地方乃數水相合  
在石渠縣時尙可蹇裳而涉下流四五十里有俄落野番之  
小水來合可以乘桴宣統元年邊務大臣趙爾豐令番人造  
筏載運牛皮至甘孜惟中有一二處尙  
須起載流五百餘里至甘孜至此不可涉也光緒十四年冬  
有一兵乘馬涉河被淹斃

經瞻對橋長十餘丈至河口宣統二年修鋼橋下流千餘里入四

川之江此一江也巴塘有金沙江發源於青海入石渠縣境

二

至距鴉龍山一至登科府不可涉至德格之崗沱宣統二年邊務  
大臣造有木船

過渡蓋格德赴昌都必渡此江也又查登科  
崗沱江中大石已經派人炸裂可行船也有小水合之經

三岩過巴塘巴塘西行必過此江有二處用木  
船渡一名牛古渡一名竹篋能渡至得榮繞雲

南境折入四川叙州府合川江此二江也察木多有瀾滄江  
在察木多係兩水相合流至鹽井波濤洶湧水勢急流用皮  
船溜索渡江下由雲南境入緬甸此三江也西康數千里水  
之大者惟此三江其餘小河皆無名如道塢河裏塘河江卡  
以西之經達河乍丫河昌都以西之嘉倫橋河番人皆稱曰  
楚如巴塘小河則曰巴楚此類不可勝記惟瀾滄江之水入  
緬甸餘皆入於川江今人於江亦謂之河故以河為記

西康土地記

西康土地有二一耕地一牧地番人稱耕地曰絨壩稱牧地曰牛廠耕地少而牧地多皆為土司呼圖克圖所有并無買賣而土司世代相承如兄為土司而弟為喇嘛則土司有以地與喇嘛者土司嫁女有以地與女者土司所用頭人如有勤勞有以地與頭人者凡與人之土地即不徵糧賦世代如斯迄今而土司之地無幾矣其向係荒地百姓舊日開墾者歸百姓世守而納土司之糧賦焉然頭人百姓若有背叛故絕等事土司得沒收其地惟喇嘛之地永為喇嘛寺受之近年土司改流其地概歸國有土司自有之地多者年產不過

四五百石牧牛馬不過數百頭故免糧稅其喇嘛頭人百姓均照章上納近數十年人頭百姓之地間有私相買賣者然買賣規則祇買數年或十年十餘年仍還賣者

明正百姓均年

此風並無永買之事惟巴塘駐有漢人塘兵開永賣之風然賣

者不過數百畝

法大國司鑄謂買有土司之地值銀數百兩邊務大臣已與交涉謂土司不能買地仍應納

種屢經邊務大臣趙爾豐出示嚴禁仍不准買賣且奏咨在

案趙爾豐嘗謂黃帝之時經土設井以塞爭端立步制畝以防不足夏時任土作貢則壤成賦周時鄉遂用貢法十夫有溝都鄙用助法八家同井耕則通力而作收則計畝而分以土地無買賣故也所以蘇明允論田制謂井田廢田非耕者

所有而有田者不耕也耕者之田資於富民富民之家地大業廣阡陌連接募召浮客分耕其中已得其半耕者得其半有田者一人而耕者十人是以田主日累其半以至於富強耕者日食其半以至於窮餓而無告貧民耕而不免於飢富民坐而飽且嬉其弊皆起於廢井田井田復則貧民有田以耕穀食粟米不分於富民可以無飢富民不得多占田以錮貧民是以天下之士爭言復井田但恐奪富民之田以與無田之民則富民不伏此必生亂如乘大亂之後土廣而人稀可以一舉而就茲西康卽土廣人稀也土地又無買賣井田之制真可以行惟此時須扼定不准買賣土地之旨以便推

行近年出示禁止買賣土地而外人在巴塘欲與民間私買

拒之有案可查故西康改流土地概歸國有若自此製定其

制度疏整其疆界則孟子所謂方里而井井九百畝其中爲公田八家皆私百畝同養公田其制可於西康見之

按井田之制自黃帝以至虞夏歷代聖人經營及周而制度始備茲井田之廢久矣雖聖人復起亦無如之何豈易爲哉然在內地各行省固不易爲若西康可爲而不爲未免令人遺憾或者謂西康土地非若內地之平原廣野皆溪壑澗谷山岳邱陵井田何能規畫不過徒有此說而已而不知井田之法非必平塞溪壑澗谷山岳邱陵而後可

規畫也就其土地之廣狹而規畫之如地有九百畝以百  
畝爲公田地有九十畝以十畝爲公田卽此類推抑何不  
可之有要視其規畫者之爲何如人耳

西康礦產記

今之言礦產者皆曰西番之地五金富饒西番地方廣大不知指何處而言若以西康論五金固有富饒則未也查打箭鑪明正土司所屬之地有燈盞窩金廠三道橋金廠又有秦凝金廠皆沙金統計每年收金課合銀不及萬兩而商人之認課採辦尙有虧折停辦者其裏塘毛丫亦屬沙金宣統三年始由公家征課計只值銀二三千金贍對收回恐金課尙不及裏塘毛丫至德格之金宣統元二年間由官採辦尙虧公款以外則無金矣光緒三十四年邊務大臣趙爾豐出重金延美國礦師劉軾輪四處查勘均屬沙金並無富饒金礦

其銀礦一項惟雜瑜有之前百年間有人採辦礦硯尙存趙爾豐亦曾派人試驗焉至於銅礦宣統二年趙委張以誠在同普開辦用款五六千金所獲之銅僅值數百金鐵礦雖有尙未試辦錫礦則巴塘有之或謂係鉛礦土人取以爲彈放槍擊麋鹿焉西康數千里五金礦產實未多觀然或礦人不良亦未可知姑如人意而言曰五金富饒

按西康地方如鹽井及白玉之贈科有磺礦察木多有礫礦此人所共知又聞明正土司巴底巴旺土司屬地皆有金礦未知是否錄之以備查考

西康職官記

古者因事設官各有其職唐虞之時羲和治歷象以敬授人時爲職伯禹宅百揆以亮采惠疇爲職棄爲后稷職在播百穀契作司徒職在敷五教皋陶作士職在正五刑垂作共工益作虞職在主工師治山澤伯典禮夔典樂龍納言職在禮樂與言至周而太宰司徒宗伯司馬司空六卿分職及秦罷侯置守改作頗多厥後歷代職官或仍舊或損益要皆因時制宜耳清之各行省職官因襲舊制其無適所治者無論矣治民之官厥維州縣而十餘州縣有一知府以監察之恐知府耳目難周又有廳以同知通判佐知府以監察州縣

然同通之官已若贅疣早有并官省職之議惟邊遠省分知府同知通判亦如州縣之官各管地方而治民焉數府之上又有巡道一員以監司府廳州縣每省巡道三四五缺不等惟一省之內有按察使司一員管刑法有布政使司一員管賦稅又有巡撫一員監督司道府廳州縣或兩省三省又有總督一員監督文武各官至於取士另有學政使一員不屬於總督巡撫光緒之末凡設有總督省分裁去巡撫原只巡撫者仍舊并將學政使改爲提學使司隸於督撫宣統之初改按察使司爲提法司改布政使司爲度支司另設民政部各分職任西康地方自光緒三十二年設邊務大臣將番地

經營奏設府廳州縣各管地面又奏設收支局學務局康安道兼按察使銜又有邊北道然政府已有裁巡道之議邊務大臣又非常設之官而管理地方規制已殊丁亥宣統三年秋代理邊務大臣傅嵩焘奏設西康省請以原設之邊務大臣收支局學務局康安道邊北道更改名稱以符行省之職官規制焉

職官名稱

西康巡撫

邊務大臣改

西康度支司

邊務收支局改

西康提學司

邊務學務局改

西康提法司

康安道改

西康民政司

邊北道改



西康郡縣記

封建之制及秦而廢郡縣之制自秦而興歷代因襲隨時宜也自郡縣置治天下者令海內之勢如身之使臂臂之使指莫不制從西康鄙陋在夷歷代但以羈縻之術官其酋長各管部落土司則令其世襲呼圖克圖則令其轉世甚有不臣不叛之部落而為野番已等於分裂土地封建王侯然卑弱者未見其忠強大者實行其悖煩兵征討幾至於歲歲興師光緒三十二年設邊務大臣乃思不容不有以制服之於是次第改流郡縣其部落焉

西康府廳州縣

巴安府

係巴塘土司地方原設巴塘糧務一員光緒三十四年改流土司糧三十二年奏設巴安縣三十四年秋邊務大臣會同川督奏改為巴安府

鹽井縣

係巴塘土司地方光緒三十一年改流征糧三十

三壩廳

係巴塘土司界地方光緒三十一年改流光緒三十四年秋邊務大臣會同川督奏改為三壩廳設通判二

裏化廳

係裏塘土司地方原設有裏塘糧務一員光緒三十一年改流征糧奏設裏化廳設同知并分管毛了毛茂了曲登崇

定鄉縣

係裏塘土司地方名鄉城會經叛土司而獨立者光緒三十一年改流奏設定鄉縣三十三年征糧

稻成縣

係裏塘土司地方名稻壩光緒三十一年改流三十三年征糧

貢噶嶺縣丞

係裏塘土司地方光緒三十二年改流此處  
四年秋奏設貢噶嶺縣丞  
仍應改為貢嶺縣

河口縣

係裏塘改流土司地方光緒三十年夏  
裏塘改流土司地方光緒三十年夏  
并分管崇喜明正土司地方

康定府

係明正土司地方原有打箭爐同知并未征  
收糧稅光緒三十四年秋奏改為康定府宣統三  
年管理改流明正土司魚通土司之地

康安道

光緒三十四年秋奏設康安道一員駐巴塘兼按  
察使銜管各府州縣

登科府

係德格土司地方宣統元年秋改流征糧經邊務  
大臣奏設登科府兼管春科土司地方分管高日  
土司靈憲土司地方

德化州

係德格土司地方居德格之中心宣統元年秋改  
流征糧經邊務大臣奏設德化州

石渠縣

係德格土司地方居德格之北宣統元年秋改流  
征糧經邊務大臣奏設石渠縣分管高日土司地  
方其他與西甯邊界

同普縣

係德格土司地方居德格之西宣統三年秋改流  
征糧經邊務大臣奏設同普縣宣統三年分  
木多呼圖克圖及納奪土司之地

白玉州

係德格土司地方宣統元年秋改流征糧經邊務  
大臣奏設白玉州

邊北道

宣統元年秋奏設邊北道一員駐登科管各府州

按以上奏設府廳州縣均各管地面征收糧稅於宣統三  
年春議准惟地名間與原稱不同應將巴安仍名巴塘裏  
化仍名裏塘定鄉仍名鄉城稻成仍名稻壩康定仍名打  
箭鑪德化仍名德格使漢夷均知交通乃便打箭鑪仍應

歸四川管理

西康理事官

乍丫理事官

係設乍丫理事官管理地方宣統三年春邊務大臣

察木多理事官

係一察木多呼圖克圖地方原設有察木多理事官

管理詞訟

以上奏設理事官係未改流時之名稱已奉旨允准宣統

三年秋邊務大臣傅嵩林以乍了察木多改流征糧應設

郡縣察木多仍應名為昌都

西康委員

尚未定州縣名目

得榮

係巴塘土司地方與雲南接壤宣統三年春邊務大臣

江卡

係康地清時賞與藏人三者宣統元年冬經邊務大臣收

貢覺

係康地清時賞與藏人三者宣統二年冬經邊務大臣收

桑昂

係康地清時賞與藏人三者宣統元年冬經邊務大臣收

雜瑜

係康地清時賞與藏人三者宣統元年冬經邊務大臣收

三巖

係野番地方宣統二年冬經邊務大臣征討投誠宣統

甘孜

係麻書孔撤兩流土司地方地名甘孜宣統三年春經邊

地分管德格倬倭章谷土司之地

章谷

係章谷上司改流地方光緒三十年督撥歸西康管理名曰

章谷委員分管倬倭土司上羅科野番地方

道塢

係麻書孔撤土司地方宣統三年奏設委員兼管之東

瞻對

係土司地方清時賞與藏人者宣統三年夏四川總督邊務大臣收回奏設委員

鑪定橋

係哨里沈邊冷邊三土司地方原設有鑪定橋巡檢歸打箭鑪應屬宣統三年經四川總督改流奏設委員

以上未定郡縣各處鑪定橋仍應劃歸四川管理

按西康所設郡縣及未定郡縣者共二十七處以貢噶嶺改爲縣則二十八處矣除打箭鑪鑪定橋應劃歸四川計只二十六處然尙有已經改流之土司投誠之野番收回之土地應設郡縣之處如靈葱土司之地在登科德格之間應設一縣毛了土司之地在裏塘德格之間裏塘距德格八九站應於適中之贈科原係德格屬地設一縣明正改流

應於打箭鑪河口適中之營官寨設一縣又於南邊之九

龍設一縣北邊之糯米章谷

又名鹿糜章谷

擇適中之地設一

縣卓斯土司改流應設一縣色達野番地方應設一縣俄

洛野番地方設一縣又甘孜距石渠七八站應於葛察寺

設一縣又巴塘距鹽井江卡約六七站應於空子頂或鱗

嶺設一縣又江卡距桑昂雜瑜均八九站應於適中之處

設一縣八宿呼圖克圖之地設一縣又於賞藏收回之碩

搬多設一縣洛隆宗設一縣邊壩設一縣類伍齊設一縣

又宣統三年邊藏會師戡定之波密白馬崗曾經駐藏大

臣奏明或由藏由康設官另議查該處並非藏地應由康

設三縣分管其地又三十九族亦非藏地距察木多近應  
由康設兩縣共計二十一縣須急早經營其尤不可緩者  
惟類碩洛邊及波密白馬崗三十九族等處至改流之巴  
底巴旺兩土司應歸四川設官也現在西康地廣人稀設  
官之處總期民足以養官將來地闢民聚再行推廣

西康邊防記

古者人至老死不相往來不交不爭其時人皆大同無分乎邊亦無所謂防炎帝慮民智之錮蔽也列廛爲市致民聚貨以爲交易自是而民知交知交則知爭閱五百年而黃帝作又慮民情之相爭也畫野分疆經土設井使土地有畛域以杜其爭焉然近聖人之居者經聖人隨時拯弊主威張而下亦安民知禮義遠者爲教化所不及民不知禮義聖人故外而不內之於是華夏蠻夷之分歷三百年而虞舜作且有蠻夷猾夏也蠻夷卽邊也以邊氓而亂內地也三五以降夏之賦夷殷之鬼方周之獫狁秦之匈奴皆在邊之列無代而

不防防而不足以制服之則征伐之使之內向明訓誥知禮義蠻夷爲夏故今之華夏大都古之蠻夷如西康番人在未改流之先蠻夷也則康爲川之邊旣建省之後華夏也則康亦自有邊康之東南與川滇接壤川滇不得爲康之邊北有俄洛色達之野番甬經投誠野番又與甘肅青海未改流之地毘連甘肅未改流之地乃爲康之邊康之西界西藏西南隅雜瑜之外界野番

野番與英屬地毗連

界西藏及野番之處則爲

康之邊且爲西康要害之邊烏得而不防哉烏得而不防哉

西康戶口記

國之強弱視乎民之多寡蓋以國之與立者民也西康番人  
不解強弱之道崇信佛教人民大半爲喇嘛不婚娶而未爲  
喇嘛者半皆弟兄共娶一妻以致生齒不繁地土雖有數千  
里戶口不滿十萬家近年改流邊務大臣趙爾豐勸令百姓  
凡有子嗣不得仍沿舊俗以多數爲喇嘛已爲喇嘛而願還  
俗者聽之弟兄多人者須各娶一婦若從此移風易俗并由  
內地移民實之戶口又可漸增矣

西康番官記

軒轅氏以雲名官金天氏以鳥名官漢人官名自古不同如西康土司呼圖克圖之官乃漢人稱番官之名也土司雖有宣慰司宣撫司安撫司長官司之分而番人不知統稱之曰人不齊乃尊大無比之意也而土司亦有屬官焉爲總理者曰襄資言贊襄土司也此外有名鼓操者有名業巴者各四名皆土司之內官分管糧稅控訴等事其管理地方之外官或名協嚴或名惡巴或名墨色或名學巴各處不同漢人統名之曰頭人番人則稱之曰本本卽官也番人稱漢官亦曰副本至呼圖克圖番人稱之曰佛都督亦曰人不齊呼圖克

圖所屬之官爲總理者曰倉儲巴其餘之官與土司所屬之官大同小異又有呼圖克圖臨事時派往他處辦事之官與以全權者名曰替身言替呼圖克圖之身也其各官職在番人自有尊卑大小之別然未詳記之而番官之名稱亦不止此近年邊務大臣趙爾豐將土司改漢官頭人名稱皆改爲保正村長矣

按宣慰司宣撫司安撫司長官司之職歷代以之隸兵部承襲之時由兵部發給號紙土司有不職督撫例得題參之至改歸漢官土千總改千總職土把總改把總職以此推之則宣慰司秩視副將矣至於藏中除達賴以下則有



噶龍四名總理事務之處名曰商上以下則名戴瑋戴木  
子仲其繙譯之官則名中譯各有品級僧官亦有堪布名  
曰其番官之妻如土司妻則稱曰子莫姑學頭人之妻則  
稱曰姜姑學亦有以姑學名土司者惟姑學上加稱之字  
不同耳

番人刑法

番人之刑極殘酷罰金鞭笞禁錮刳目割鼻刳手刳足投河  
剝皮惟無大辟耳其捕擒賊盜仍有槍斃斬首碎屍之事其  
刑皆由土司呼圖克圖鐵棒頭人任意爲之刑具有皮鞭黑  
屋鐵鐐鐵鍊鐵刀等項自光緒三十二年改流之處均經  
邊務大臣趙爾豐示諭凡有事故必控訴地方官審理擬罪  
稟辦酷刑乃免

按碎屍非番人之刑凡人死大半將屍碎而喂鳥故不以  
爲刑也

西康百穀記

上古無穀之名人皆茹毛飲血擊搏挽裂與禽獸爭一旦之命以為養生庖義氏教民佃漁畜牧為食肉計也穀何有焉後千餘年而神農氏初藝五穀又千年而有虞氏始命棄為后稷播百穀諸夏百穀之所由來已四千餘年矣西康近在川邊如打箭鑪之外距高陽氏故里之若水

黃帝之子昌意降居若水

即瀘水今之打冲河距打箭鑪只五日程顯環高陽氏乃昌意之子

夏后氏故里之石紐

禹生

於石紐即汶川縣之廣柔縣今汶川縣

均不過數百里而番人不效法耕稼

之事榛莽自封只知畜牧迄今牧者多耕者少而所種之穀不過菽麥與豆其山高水冷不產百穀之處無論矣而能產

之處如巴塘雜瑜產稻穀種之者亦鮮耒耜仍如神農之法斲木揉木為之犁則二牛一具具不繫於牛項而繫於牛角又不糞其土不辨騂剛赤緹之地焉知羊糞牛糞之宜近年邊務大臣趙爾豐征討巡閱之地徧告以耕稼須用糞番人始尚嗤為污穢諭以化腐朽為神奇乃間有用糞者趙並於內地購五穀子種分給民間令兵士教之種焉光緒三十二年巴塘墾地種稻梁甚佳惜民間不學種故漢人之迂腐者亦曰番地五穀不生不知不生者乃寒冷之地豈以和暖之地一概而論哉惜無播百穀之后稷以教民耳番人所種之穀如左

稻穀

巴塘得者榮桑昂雜

包穀

又名玉麥定鄉巴塘均種

粟穀

又名小米定鄉

麥

河口有塘稻成大麥南麥燕麥之分

青稞

亦麥類番地皆種

菽

巴塘鹽井定鄉稻成均

豌豆

巴塘鹽井稻成定鄉德格

蠶豆

巴塘對均種

按番人所種之穀不及十類以青稞為大宗各處均種其餘有種不種之處然穀不熟曰饑菜不熟曰饑番人

不食菜故不學為圃雖河口道塢甘孜巴塘乍了有種菜者皆駐台漢塘兵所為無塘兵之處仍無菜宣統二年邊務大臣趙爾豐由川購菜種分發各屬令其試種并通令各屬勸民種黃豆以作菜焉然考之爾雅翼梁者黍稷之總名稻者漑種之總名菽者衆豆之總名三穀各二十種蔬果之屬助穀各二十種凡百穀是菜亦在穀之內茲將康地所產之蔬名並載

葵

巴塘產

韭

巴塘產

藿

巴塘產

薤

巴塘產

葱

巴塘產

以上名五菜靈樞經云葵甘韭酸藿鹹薤苦葱辛

菜 巴有青菜白菜

苜 巴塘產

麻 巴九穀之地內有麻

蕨 一名菘蕨也巴塘又名羅蘭即

瓜 六穀內有瓜然有王瓜苦

芋 洋芋巴塘道場產

茄 巴塘產

芥 登科巴塘產乃野芥

葵 巴塘產

菌 石渠巴塘產

蒜 三岩巴塘產

按百穀有蔬果考前漢食貨志註應邵曰木實曰果草實曰麻晏曰有核曰果無核曰麻臣瓚曰木上曰果地上曰蔬則西康之果名又可并記

梨 巴塘鹽井產

桃 巴塘鹽井產

杏 巴塘產

棗 西藏產

柑 巴塘產

榴 巴塘得榮產

柿 小者巴塘產大者西雷產

胡桃 巴塘乍了鹽井產

葡萄 巴塘產

櫻桃 巴塘產

西康糧稅記

西康糧稅土司呼圖克圖並無定章征收亦多寡不一百姓耕地載種一斗年出產十餘斗者徵糧數升若土司呼圖克圖之公地有與百姓之地相連者則免百姓耕地之糧令百姓備子種代耕公地秋收時土司呼圖克圖但收公地所產之糧其徵糧固輕而徵銀則較糧重一二倍每年徵糧之外若有婚嫁兵事則另派百姓納銀一年數事則派數次一二年無事則以三年朝貢之事派之而徵糧係頭人經手土司徵糧一斗頭人加徵一升或半升不等於牧場則徵馬牛羊或牛羊肉或酥油其派銀仍與耕地者同自光緒三十一二

年間裏巴兩塘改流另訂糧賦章程徵糧雖較從前加重雜派毫無百姓聞風咸怨土司呼圖克圖苛虐極願改流惟改流之事不利於土司呼圖克圖及頭人等若輩故阻撓耳茲將改流後邊務大臣趙爾豐奏明征收糧稅章程另行摘錄以備參考賦則之輕重

一 改流之後地分三等上等地下種一斗每年出產十餘斗  
征糧一斗二升中等地下種一斗征糧一斗下等地下種一斗征糧八升

二 種地之人無論喇嘛頭人百姓一律照章納糧

三 每年遇有旱災水災霜災由地方官勘明按照減征或全

免倘收成毫無分別貧富按丁口賑濟

四納糧之後凡從前所有上納馬牛羊與皮肉酥油及有事時所派之銀三年朝貢所派之銀一并裁革

五征收糧稅不准官及保正人等浮收分釐

六耕地納糧草場納稅

七凡養馬牛羊之家馬牛每支年納稅銀捌分羊十支年納銀捌分

八每戶所養馬牛羊除馬二支牛十支羊十支免稅

九馬牛羊合計不及牛十三支者免稅

十馬牛羊不及二歲者免稅

十一馬牛羊宰殺倒斃者隨時報保正轉報免稅

十二馬牛羊出賣賣者免稅買者納稅

西康差徭記

差徭之重莫過於土司呼圖克圖凡所屬百姓除上納糧稅外有馬差牛差步差之分無論遠近百姓皆自備口糧牛馬輪流赴土司呼圖克圖處聽差其土司呼圖克圖及大小頭人土兵等有事出外或游玩均用支差牛馬所有自養牛馬羊並令百姓輪流供給草料而所用柴水修造房屋無一不由百姓自備口糧工作其事稍不遂意責罰隨之貧苦百姓壯者當差老弱乞食而餉之兇年亦無賑濟之事轉於溝壑散而之四方者不知凡幾近年來邊務大臣趙爾豐每至一處傳集番人數十數百詳細詢問凡未改流之處百姓無不怨嘆嗟憤懇請改流一經改流卽出示曉諭照章上糧納稅差徭概免如用烏拉悉照章價僱不准有支差名目卽官署軍營用馬夫火夫及修造之事必按日議定工費口食僱用西康之差徭於是乎免

按西康改流惟德格土司自願請改其餘皆百姓願改而土司呼圖克圖頭人喇嘛等不願何也土司呼圖克圖改流之後無糧稅徵收也頭人喇嘛向不納糧稅今則上納也烏得而願然欲國利民福遑能瞻徇少數之士司呼圖克圖頭人喇嘛哉



西康鹽稅茶釐記

鹽茶兩宗人之日用所必需西康產鹽地方以鹽井縣爲最其鹽產瀾滄江之兩岸水由巖穴而出江東之鹽其井深數尺或丈餘番人掘井負木桶入井取水江西之鹽其井深二三尺鹽水半皆溫泉亦以木桶負水不用火熬但於兩山架木如樓樓上築坭格成土箱每箱寬長均只七八尺或丈餘不等俟坭乾可以行人將所負鹽水注於其內風以動之日以暄之一日即乾成粒用帚掃之每一土箱得鹽五六斤惟江水泛漲鹽井淹沒天雨連綿則不能晒每年只出鹽二萬馱上下之譜銷售邊地及雲南維西麗江一帶光緒三十一年

年冬設局征釐每馱收銀四錢八分至今六年每年只征銀六千八百九千金及萬金者僅一年耳若茶則番地不產係由四川打箭鑪所購征税必礙川茶銷路宣統元年德格改流登科石渠兩屬與西甯毘連由康地運茶往西甯者德格頭人向於渡金沙江時而收其釐改流之後仍如舊歸官收年收釐銀不及千金均經邊務大臣趙爾豐奏報有案若爲川茶銷路計此項茶釐仍應裁革然以今日西康所收論一日鹽稅一日茶釐

按西康地方甫經開辦正提倡商務之時若關有征市有和鹽鐵有權酒有課茶有算則商賈裹足不前矣故一切

貨物概不徵收釐稅惟鹽乃番地所產銷滇者多故收稅而收且從輕若茶釐裁革川康劃界定後應明訂章程於打箭鑪設局出關之貨歸川征收入關之貨歸康征收而釐稅之則均宜從輕乃能提倡西康商務也

西康兵事記

三皇之世無爲而治五帝之時兵由是興自神農伐補遂而後蚩尤以金作五兵曰弓曰矢曰矛曰戈曰戟有兵也而兵事卽有黃帝阪泉之戰迄唐堯則征驩兜虞舜則征有苗夏禹則征共工夏啟則征有扈仲康則命胤侯掌六師征羲和征畎夷降及商周干戈擾攘無代無之然第以器言兵非以人言兵自秦漢而後以執兵之人爲兵凡征戰之事可統名之曰兵事西康地方前之兵事故牘可稽清之光緒三十年以來番人自相爭鬪角逐者無論矣而川兵往征之事三十一年征泰凝征巴塘尙無很戰三十二年征鄉城征稻壩則

戰數月而克爲漢番最大之烈戰旋征階翁寺則一戰而勝三十四年征德格之贈科宣統元年征石渠戰於麻木戰於卡納亦一戰而勝至討江卡桑昂類五齊碩搬多洛隆宗邊壩番人皆望風頽靡宣統二年討三巖五路進兵僅四路攻戰而一旬卽搗巢穴宣統三年討得榮收贍對不戰而勝人之兵也續討魚科迎刃而解邊藏會討波密邊兵戰則必勝亦不日收平未嘗老師糜餉說者曰器械之利士卒之強以此禦敵誰能禦之以此攻城何城不克區區番人劣弱之兵朽鈍之械何足言哉是說也亦知己知彼之言也而知己知彼之事尙不只此若徒恃己之強輕人之弱趾高氣揚旣失

律而寡謀又無備而少算小羅之楚子卑邾之魯侯能不爲前車之鑒耶孟子曰天時不如地利地利不如人和兵術之要也又曰以力服人者非心服也力不贍也以德服人者中心悅而誠服也用兵之事更有東征西怨南征北怨之道西康番人雖曰蠻蠢而好生惡死之心好善惡惡之情與人無異以其困於土司呼圖克圖之虐政久矣自光緒三十二年鄉城戰後軍威大振而裏巴改流暴斂橫征一律裁革番人仰足以事父母俯足以畜妻子風聲傳播百蠻歸心欲脫土司呼圖克圖及頭人等之壓制私懇邊務大臣趙爾豐改流其地而迫於土司呼圖克圖之威勢當其召集抵禦又不能

不陽奉陰違迨漢兵入境雖未嘗倒戈攻後而棄甲曳兵壺漿箠食者已有多數矣土司頭人但以少數之螳臂而當轍不能以首爭首以力搏力或逡巡而逃遁或俯帖而投降又得執政者披心腹見情素墮肝胆施厚德優以待之番人焉有不服尙欲逆執事之顏行者哉近年用兵所向成功者職是之故也恃力者亡恃德者昌兵事之道固有不戰者在歟番地行軍

雇用烏拉

烏拉者乃番人支差之名人曰烏拉娃馬曰烏拉馬牛則專名曰烏拉行軍西康自打箭鑪出關起搬運輜重不能雇夫

概雇馱牛又無轎夫均雇騎馬每牛一頭能馱一百二十觔無論雇用數十數百皆土司代雇土司改流由官代雇凡牛馬一支每站脚價銀一錢六分在途倒斃由雇者照章賠償西康各處皆然此宣統三年七月邊務大臣傅嵩林新訂章程分咨川藏有案然但運以運公物而言運私貨不在此例  
雇用通事

通事卽舌人之稱軍行關外漢兵與番人語文不通交涉不便惟打箭鑪有能通漢番語言之人雇之以爲通事凡有兵數十人卽雇通事一名月給口食銀三四兩不等如通事能兼通番文者每月口食加一二倍隨軍出關惟此等人舞弊

者多宜防之從前出關通事無不需索番人如邊務大臣趙爾豐所用札通事在德格需索土司喇嘛銀數千兩之多又在貢覺將償還番人牛馬數百支私行提留變價宣統三年事發覺得實據趙乃誅之其他通事之舞弊者不可勝記

### 連帳房糧米

西康道上無旅店番人房舍亦少光緒三十三年邊務大臣趙爾豐創修打箭鑪至巴塘旅店每處只房舍一座但能容數十人軍行前往須帶帳房而糧米一項亦由打箭鑪裹運前進關外無飯店亦無米雖有小麥大麥青稞包谷莜子豌豆各雜糧必到設官處方能購買故凡出鑪關番地寒冷帳

房被褥固宜隨帶鍋碗米麵均應攜行也

### 包裹車需

出關軍火子彈裝箱之外應加包牛皮而軍米軍裝及其他各項軍需無一不以牛皮包裹者蓋以烏拉馱運沿途擁擠狂奔互相衝撞或墜於地或撞於石或掛於木容易損壞木箱故加牛皮包裹

### 裹帶藥品

番地無藥餌番人雖用藥其名目與漢人不同不達彼之藥性故不敢嘗光緒三十三年邊務大臣趙爾豐由內地購藥出關設有官藥局而藥品不齊行軍時仍宜裹帶

### 裹帶食物

番人向食糌粍即青稞炒酥油牛乳造者牛羊肉不食菜漢兵出關如米糧猪肉猪油鹽菜等項均宜裹帶向來番地漢兵間亦養猪但瘦小耳

### 多製棉衣

西康地方天氣寒冷崇山峻嶺週年積雪惟河口道場巴塘得榮等處有可服單衣之時其餘各處服夾衣之時少服棉衣之時多軍行宜多製棉衣

### 紙札筆墨

番地無漢人紙札筆墨雖有蠻紙物劣價昂軍書緊要宜多

購紙札筆墨攜行

工匠器具

軍中工匠應用器具宜自內地多購攜行番地無器具可購需用時不能覓也

木碗竹箸

關外行軍以烏拉馱運器具易於損壞故不用磁碗而用木碗番人以樺木葡萄根爲之內包以銀也番地無竹番人食糝粬係熬茶而和以酥油將木碗盛糝粬灌以茶用手團而食之故不用箸亦無箸賣漢兵出關宜多購箸攜往

鞍韉籠繮

軍官僱用騎馬須自備鞍韉籠繮番人只馬而已且認僱騎馬之人不隨馬行必俟到應換烏拉之處乃自來清查牛馬其鞍韉籠繮仍歸乘馬人收存換馬復用

採買軍糧

出關軍人初時食糝粬雜糧每患腹疾故出內地購米運往兼食其米皆由清溪天全蘆山雅州名山洪雅各州縣採買但須與打箭鑪清溪商人包買由商人赴各處隨買隨運至打箭鑪上納其價雖昂較之公家派人採買之價廉也每米二斗商人出麻布口袋一條裝盛由公家僱番人加包牛皮每米一包縫工皮價計銀二三錢不等包縫後於縫孔處以

牛血調石灰塗之免雨水浸濕霉壞至糶粃麥麵及馬料等項向各處地方官採買有一定價值較民間價廉

### 轉運軍糧

軍米既由商人買至打箭鑪上納而公家加包牛皮轉運出關係由官令保正催僱烏拉照章按站發給腳價令其輸送至設有地方官之處點交若地方安靖可不派兵護送有戰事處所酌量用兵解運以免失事各處均由地方官轉運較兵站便利多多將兵站之兵調赴前敵則用兵少而需糧亦少損費損款矣其出關之兵共計若干名除就地採買糶粃麥麵兼食外每人每月應給米若干通盤籌畫按數輸運糜費損而軍食亦不致缺乏至地方官所賣官糧青裸麥子每斗價銀六錢四分能磨麪二十三斤每兵一名除食軍米外應買若干稞麥亦宜核定以免多買轉賣漁利

### 關外軍裝

關外天寒風冷軍士宜用頭巾乃可衛生雨具一項若油布雨衣帽風吹卽碎須用呢或番人所織氈衣及氈衣方耐久若行雪地須戴墨色眼鏡以免眼光傷損疼痛歷年軍士受此病者不少

### 行雪地忌烤火

軍人經過雪地兩足冷凍到站後往往以火烤之足起泡潰



爛或裂足或墮指慘狀難言歷年出關軍士凡墮指者番醫咸謂烤火過度所至宜忌之

### 皮船溜索渡江

西康江河駛延行軍如河口之鴉龍江牛古渡竹巴隴之金沙江德格崗沱之金沙江尙有木船過渡其餘各處或用番人所製牛皮船每載只四五人不能多載又有皮船俱無番人用溜索兩條束於江岸由東渡西之索東岸高西岸低由西渡東之索西岸高東岸低索上穿一木筒筒上繫一索垂一尺許繫一橫木人坐於木手抱木筒溜而過之所以過渡之處軍行遲緩

### 番人戰策

### 深林埋伏

西康地方童山固多而茂林亦廣兩山排列一澗中流古樹森森參天蔽日番人埋伏其間官兵經過寇從林內施槍但聞槍聲見槍烟受槍子而不見舉槍之人寇能擊兵兵不能擊寇宣統二年冬官兵由貢覺進攻上三巖將至下如即遇埋伏從兩山林木中夾攻官軍傷亡數名而進退維谷始用火焚林幸左山林木雜有荆棘焚之即火焰燭天煙光照地寇竄去而右山皆大木不能火官兵拚死仰攻入山寇乃且戰且退官兵輜重乘時急趨三十里至下如乃無大損

夾谷包圍

番地夾谷最多谷道修短數里數十里不等兵行其間番人則四面包圍槍石并擊若林木茂密且用火焚燒軍行此地亟宜留意

高坡滾石

蠻荒多崇山峻嶺番人於山嶺上壘石俟官兵登至半山或經過山下則滾石如巖崩而墜兵無可避之處惟有待斃光緒三十一年春駐藏幫辦大臣鳳全在巴塘鸚哥嘴即遇滾石

窄路劫糧

關外輸運軍糧概用烏拉山間道路窄狹異常糧運經行番人於巖穴間能藏身之處用槍猛攻烏拉驚逆擁擠墜巖則糧餉全被劫矣雖曠野間亦有劫糧之時究竟不能全劫如宣統二年冬西軍左營在中三巖被劫輜重不過十分之三而已

暗火焚寨

番人房屋或築土牆或砌石牆高二三層下層爲牛馬廐上兩層住人大院者名爲寨兵入敵境夜宿帳房屢被寇撲故每日攻戰必奪一二寨而紮營寨中柴草俱全防範稍便乃番人於柴草中伏暗火大風一起柴寨俱焚兵縱逃脫焦頭

爛額矣

黑夜撲營

關外行軍夜間住宿張幙紮營番人或乘晚膳時夜眠時黎明時潛來攻撲光緒三十一年冬官兵進攻鄉城至波密地方卽被番人於夜眠時撲營兵士傷亡十餘名宣統元年夏官兵進攻雜渠卡番人於黎明時撲營兵士傷亡數名土兵傷亡二十餘名幸兵有防備散隊擊之斃寇百餘名寇乃潰

阻擋關隘

番地雄險隘眞能一夫當關千軍難進軍行至此若不能以礮轟擊惟有覓嚮導尋路繞越

三十五

折燬橋梁

番地橋梁或長數丈十餘丈概用木駕遇有兵事則將橋梁焚燬使兵不能過河

掘斷險路

牛山橫路旣長且險番人阻兵每將險路掘斷或數十丈或一二里軍行至此困難異常

據守堅碉

番人住房其牆堅厚非土卽石名曰碉房高二三丈房頂平築土無瓦無草或一村數戶數十戶不等堅厚之牆礮彈難擊番人據碉而守光緒三十二年鄉城桑披嶺寺卽係碉房

兼有圍牆者官兵攻半年乃克

### 攻險

山徑之間峰巒層疊迂迴曲折道路崎嶇突有卷阿草木蒙  
龍番人持矛鋌白刃於其中兵至則出而扼險相薄兵卒不  
能並進首尾不能相顧槍礮難施番人卽於險處獲勝

### 詐降

番人狡展官兵入境率衆來降窺其兵單卽羣起而攻光緒  
三十二年春官兵經過稻壩番人來降俟官兵入寨乃圍困  
之一月之久援兵到始解圍

### 番人軍械

三十六

### 大礮

大礮每支重三四十觔五六十觔不等有銅鑄者有鐵鑄者  
長三四尺能容火藥十餘兩鉛彈三四十兩

### 土槍

槍以熟鐵造成子藥均由前膛裝入卽內地鳥槍之類其槍  
托上有無飾者有飾以金銀珠玉者木托之首用山羊角二  
支長尺餘錠於托上爲叉能伸能屈放槍時以叉支地取槍  
不搖動而命中鉛彈以鉛鑄之乃圓形

### 快槍

快槍有獨子五子七子九子十三子等項由西甯購來俄國

快槍亦有

戈矛

戈矛皆用木柄纏有鐵絲其長不過一丈

鋼刀

鋼刀長二三尺寬一二寸或以鐵爲鞘或以皮爲鞘鞘上間有飾以金銀珠玉者刀鋒甚利雖快鎗亦能砍斷光緒三十二年攻克鄉城官兵搜山於巖穴中遇一番匪用刀砍之兵以九子快槍架格被刀砍斷

弓矢

番人所造弓矢與內地同宣統元年官兵於雜渠卡遇番人

三十七

用之

鐵盔

冑也

番人所造頭盔與漢人同光緒三十二年攻鄉城所獲甚多

鐵鎧

甲也

鐵鎧或以鐵製造成片每片大如手指片上鑿孔以皮線結成甲又以有鐵絲結成者其兩手股亦以鐵造成筒而帶之宣統二年攻三巖獲有多具

番人將士

將官

番人無知兵之將用兵時係以大頭人爲帶兵官

騎兵

番地之人大半牧馬故皆善騎臨用兵時凡有馬之家卽派爲騎兵充馬隊

步兵

番人無操練之兵平時打獵者多故能放槍命中臨用兵時按戶抽丁凡十六歲以外五十歲以內均令其當兵

按番人戰策惟佔地利設詐降人皆曰技止此耳况器械不利士卒不練何所恃而跳梁哉不過曰愚而已矣然亦未可以愚而忽之也愚者千慮必有一得設險亦守國之一端光緒三十年英兵進西藏死千餘乃入其境三十二

年川兵攻鄉城圍半年始掃其穴鄉城以後或戰則必勝或不戰而亦屈番人之兵者皆以久居番地洞悉番情之故古人云知己知彼百戰百勝故將番人戰鬥之策之器之兵大畧錄之以俟用兵者知之耳行役番地尙慎旃哉

西康正朔記

西康正朔每年由川省建昌道將華用陰曆頒發打箭鑪裏塘巴塘察木多糧員轉發土司領用惟土司不識漢文故不適於用仍習用番曆其番曆與華人陰曆微有不同華曆遇閏之年番曆不閏華曆不閏之年番曆遇閏而月建之大小亦不符然尙間有元旦與華曆相合者惟三巖一區與諸番之正朔又異彼之正月有爲華曆番曆之五六月者至於番人甲子亦以十幹十二枝所屬爲定如庚戌則曰鐵狗辛亥則曰鐵豬餘皆倣此宣統二三年間邊務大臣趙爾豐始由內地刷印正朔表漢番文字俱全發給土司頭目人皆爭用

之西康正朔乃與內地陰曆同

西康度量衡記

西康度量衡各土司呼圖克圖野番自爲製造彼此不相同各村落亦不一丈尺一端番人工匠商賈俱無之修造房屋概築土牆所用木料但相其高下長短斷而用之結構處並不鑿孔又不用棹椅橙其土司寨喇嘛寺皆雇漢人工匠建造於是番人亦間有學之者然僅學其粗而不學其精并不講求度法商人買賣如氈氍之類則以兩手左右伸而度之呢絨布疋以方爲計亦不用度至於升斗番人無升有斗斗稱爲尅無論什百仟萬皆以尅爲數又有批或二十批爲一尅或三十批四十批爲一尅各處不同而稱批尅之名亦異

四十

若秤與稱番人無秤有稱稱名架碼大小不等或番稱一觔爲漢稱二三觔或番稱一觔爲漢稱十兩如作是又有戥作等名曰索拉所衡輕重與漢人不同若衡金銀番人則以三錢二分一元之盧比相衡盧比有鑄成半元者重一錢六分又有八分一起番人皆以之爲秤碼焉宣統元年邊務大臣趙爾豐始由川省購工部尺由打箭鑪造升斗每斗盛米三十觔重并購製庫平稱運出關外發給各屬令民間照製使用其長短多寡輕重乃統西康之度量衡而爲一



西康圖法記

黃帝制國用以金刀泉布帛爲五幣至周成王作九府圜法  
治銅爲錢萬民利用而西康番人向用金銀不用銅故無圜  
法何以見之考土司歷代相傳皆崇信佛教家中設一淨室  
鑄畫佛像而供之延喇嘛朝夕誦梵經名曰經堂每歲除夕  
凡所食之酥酪糌粑茶葉牛羊肉及所用之金銀無不取而  
供佛儲於經堂永不取用茲查前代所儲或金條金粒或塊  
銀碎銀清之乾隆年間藏中所鑄銀圓每圓重一錢者亦有  
之迄光緒年間始儲英國銀圓卽印度盧比每圓重三錢二  
分圓之陽面鑄英皇像陰面鑄花紋而每圓三錢二分作爲

四錢行使番人亦樂用之者蓋以番地無劃一之權衡行使  
銀塊輕重之間嘗有爭執用盧比而輕重定矣故樂用之光  
緒三十年川督錫良奏明仿鑄印度盧比同其形式輕重而  
陽面鑄中皇像每圓作三錢五分行使番人始而爭用惟番  
地中貨少而外貨多以川鑄盧比購貨外人不用卽用每圓  
只作二錢八分或三錢不等印度盧比仍作四錢於是販川  
茶之商用四川盧比販印貨之商用印度盧比康地之裏塘  
察木多一帶川圓多而印圓少藏地之拉薩噶達一帶川圓  
少而印圓多駐藏兵餉皆由番商在打箭鑪領川圓購茶回  
藏兌餉官兵用餉迫不及待任之利息而三錢五分之圓又

作爲二錢八分受虧不少宣統元年駐藏大臣聯豫邊務大臣趙爾豐文電交咨四川總督趙爾巽請照本位三錢二分行使乃除去四川藩司及造幣廠之弊焉趙爾豐卽出示曉諭自宣統二年正月一體照三錢二分通用并奏明由川鼓鑄當十銅圓一千萬圓運往康地與盧比相輔而行每一銀圓三錢二分合當十銅圓四十四圓上納糧稅一律使用并由打箭鑪購銅錢一千釧運巴塘行用自是而西康之圓法始與川同

按西康建省自此可用七錢二分銀圓將盧比收運西藏行使則中國各省幣制圓法均畫一也

西康文學記

西康番人以佛教爲文學學佛教者稱爲喇嘛卽華人稱和尚者也各處建寺院多至數千人少亦數百數十專講佛經不婚娶好慈悲信誼盟重鬼神凡人有子五人者則以三人學佛有子二人者則以一人學佛甚至有一子而亦學佛者概習藏文與華洋文字均不同繕寫之法由左行右以煙爲墨以竹木削錐爲筆其字母音韻與華文同因華文字母亦釋神琪所傳也惟華文音韻如字彙所載係三十二字中有兩句係五言藏文全係四言故只三十字而華文三十二字大半有音無字假借亦多藏文皆有音有字亦無假借其傳

世之書佛經之外醫卜星相及記事歌唱等書皆有之惟與華文字不同語言亦異語文不相通政治故隔閡所以難於用夏變夷也光緒三十二年設邊務大臣趙爾豐以裏塘巴塘之改流也文告宣佈必用繙譯語言諮詢必用舌人繙譯舌人不良行政大有窒碍故於光緒三十三年春奏撥經費委吳嘉謨充學務總辦選聘川中文士張卜狝等出關設學堂擇番人年幼子女教以漢語漢文說禮樂而敦詩書初於巴塘裏塘河口鹽井定鄉稻城貢噶嶺興辦宣統二年推廣於江卡乍丫察木多德格白玉宣統三年三巖貢覺甘孜絨壩擦登科均設學校焉甫屆三年巴塘之男女學生已能作

數百言文字闢榛徑而開文化吾道其以西乎

番人衣冠記

上古衣鳥獸之皮自皇帝作冕旒正衣裳其元妃嫫祖教民育蠶而胡曹作衣此中華衣服之所由始西康番人不事桑麻衣服以牛羊毛爲之其毛紡織如布或寬六七寸八九寸不等名曰氊牛毛織者黑色羊毛織者白色即以氊縫衣喇嘛之衣尙赤色則以茜草染白氊爲赤餘皆服黑白兩色其貧者及野番無氊但服牛羊皮而富者購藏中所織之氊氊或印度之呢絨並內地之綢緞洋布而作衣服衣之形式與內地僧人衣服同衣袖長大服衣而束以帶凡一切應用之物皆環納於懷背之間焉若大袴小袴番人無之惟婦女間

有用裙者至於冠之形式無一定惟土司之冠仍用漢人式頭人之冠以牛尾之白毛染紅色繫如團扇式厚寸許其頂平周圍之毛皆截齊另作一圍載於下便戴於首至喇嘛之衣無袖而以紗數丈纏於身股之間其冠係黃色以呢絨爲之如堪布鐵棒則冠似桃形以則如雞冠形然此皆見官時所用者平時則或氊或呢或狐皮羊皮作便帽加於首而已光緒三十二年邊務大臣趙爾豐示令番人服袴迄今改流地方半皆服之然袴皆未緝襟也衣冠亦間有效漢人者

衣貨列左

狐皮 各處均產

羊皮 均產

狸皮 巴塘德格均產

猴皮 巴塘鹽井江卡均產

獺皮 德格三巖產

豹皮 三巖番人以爲衣

綢緞 由四川浙江購

呢絨 由印度購

金絲緞 由印度購

銀絲緞 由印度購

毛綢 波密產

棉 波密產

麻 雲南購昔年巴塘土司每年收運界滇民之麻布

絲 宣統二年河口養蠶取絲

洋布 由印度由四川購

棉布 由四川購

按番人以皮衣爲其皮但用牛奶酥油搓之使不堅硬不似內地之用硝水也所用之褥亦以虎豹豺狼熊狐鹿獺

之皮爲之所用之墊或以皮或綢緞爲之內實獐毛厚二三寸四五寸不等所用之靴或用呢絨或氈氍或氍或牛羊皮爲之其底薄只牛皮一層也

番人禮記

大同之世天下國家不必有禮治之而禮自備西康番人以夷狄之行何足以語此然吉凶軍賓嘉之五禮彼雖不識其義而行之亦有合焉如日蝕月蝕祈晴禱雨知其禮拜合乎吉禮父母死亡雖不知葬而悲哀號泣合乎凶禮遇有爭鬥調兵相戰合乎軍禮歲時元旦頭人咸拜於土司合乎賓禮嫁娶通媒妁合乎嘉禮惟皆不齊不備耳近年改流邊務大臣趙爾豐教以葬禮而婚禮亦爲之改良使與漢人同風焉

番人禮儀如左

番人遇有日蝕月蝕喇嘛則跪地誦讀佛經土司頭人老幼男女則於房上焚香薰烟望天羅拜

四十七

番人於收穫時喜慶有秋則宰割牛羊並以新收青稞磨糶糶於平原中安設男女盛服環跳歌舞以祀地神名曰跳鍋

莊

跳鍋莊之事  
平時亦爲之

番人於父母之死號哭躄踊捶胸抓髮哀痛迫切與漢人同惟葬則有天葬水葬火葬與漢人異如人死以屍送之於山任烏鴉食其肉所餘之骨收而碎之敷以麥粉復爲烏食必食盡而後止名曰天葬又以屍棄於河內名曰水葬又以屍用火焚化將灰和坭大如雞卵棄於岩穴間名曰火葬死後無祭祀之禮至於夫死妻則不拘早遲即可另嫁妻死而夫

未滿三年卽娶人則笑罵之

番人軍事由土司令各頭人選派百姓年在十六歲以外五十歲以內者當兵卽歸頭人統率

番人於每年元旦土司則服盛服而坐頭人百姓拜跪以賀之其頭人平時見土司或跪或立不敢坐土司所用之僕名曰小娃爲土司奉茶則跪而進

番人婚嫁如土司頭人以及富者皆用媒妁雖間有苟合爲婚者仍以媒妁爲禮且土司不得娶所部頭人之女爲妻殆防微杜漸之意其娶婦時仍用衣服首飾令人往迎新婦以帕蒙頭乘馬至夫家則以人扶之下馬入室與夫並列席地

而坐則親戚鄰人往謁皆以白綾一塊名曰哈帶搭於夫婦肩上以爲禮

番人以折腰張口伸舌伸掌爲賓客敬禮而拜鬼神及見土司呼圖克圖仍以跪拜爲敬禮拜則稽顙名曰推頭爲至敬之禮而番官相見亦有以脫帽爲禮者



番人樂記

移風易俗莫善於樂中國自伏羲造琴瑟軒轅造律呂作成池文之以五聲播之以八音歌之舞之歷代流傳番人之樂蓋亦昉此如金石絲竹匏土革木八音之器大半購自內地惟音之節奏與漢人不同歌舞與漢人亦異耳歌有古調已傳多年者有新聲按年由藏人新譜者語文雖不同譯之則無非燕賓客和夫婦樂豐年慶太平也

按聲音之道微妙難言自黃帝定宮商角徵羽爲五聲傳之後世至周武王加變宮變徵爲七聲厥後失傳仍只五聲故孟子曰不以六律不能正五音或者謂七音之傳惟

四十九

西域有之故嘗徧訪番人如子母字有平上去入四音爲縱有宮商角徵羽半商半徵爲衡共七音故奏絃之間亦有七音云乃知人言非欺我也

番人姓氏記

考上古之姓氏或以事或以地各有取義太昊作網罟以教民佃漁卽曰伏羲氏炎帝作耒耜以教民耕稼卽曰神農氏黃帝生於軒轅之邱卽曰軒轅氏長於姬水故以姬爲姓顓頊國於高陽卽曰高陽氏帝嚳封於高辛卽曰高辛氏帝堯受封陶又封唐卽曰陶唐氏皆爲黃帝之後故同姓姬焉厥後姓氏或因生賜姓胙土命氏及以字以謚以官以邑有封土者以封土命氏無封土者以地居命氏皆本古人之意也西康番人雖不知姓氏而考其稱謂姓雖無而氏則有如德格土司則稱德格家孔撒土司則稱孔撒家頭人百姓亦以

地居稱遷居他處仍以原地居相稱此與漢人之稱氏同義至於命名或以官或以神或以山川或以草木禽獸取其吉祥者而名之亦與漢人之命名同情惟地居之名相同者衆命名之義雷同亦多往往高曾之祖曾玄不知亦不能辨族故婚姻瀆焉近年改流邊務大臣趙爾豐每於設官處所議百字爲姓令民間將現在所知同宗之人共認一字永遠爲姓番人之姓氏自此正

西康醫藥記

人欲盡年須療疾病欲療疾病則醫藥尚焉溯自神農察草木作方書中國醫藥之道立人民宜之已四千餘祀矣西康番人有疾病尙禱祈或延喇嘛而誦梵經或入寺院而拜佛像畫符以避邪崇問卜以測死生人人皆然亦間有番醫而驗病之方不察明堂不究息脉但以病者之溺一盃用木枝撓之觀其顏色泡影而已至於用藥其藥名與漢人不同然亦不外草木鹿茸麝香之類仍有傳書而用醫藥者少光緒三十三年邊務大臣趙爾豐憫番人之疾苦兼之漢人軍民出關醫藥不便故由川省購藥餌延醫士赴裏塘巴塘鹽井

等處爲人療病並延痘醫前往爲人種痘始而番人疑慮繼則延醫服藥者絡繹不絕乃奏明設局廣延醫士由公家給予薪水於德格登科河口稻城凡改流之處皆有醫士以療民病西康醫藥由是盛行焉

西康產藥列左

鹿茸 西康各處均產

虎骨 西藏工布產

麝香 同上

花椒 巴塘德榮產

雪蝦魚 西藏產

桑皮 河口巴塘產

猴血 巴塘鹽井江卡產

蘆葍子 巴塘江卡產

虫草 裏塘德格均產

杏仁 巴塘鹽井產

貝母 德格稻城均產

棗 西藏產

黃連 桑昂雜瑜均產

人參果 德格乍丫產

大黃 裏塘甘孜均產

茜草 德格乍丫產

雪蓮花  
雪猴子 乍丫產

老鸛草 裏塘火竹卡產

紅花 西藏產

青菓 西藏產

薏仁 西藏產

蜂蜜 三巖巴塘產

牛膠 巴塘產

羌活 裏塘產

兒茶 巴塘產

雄黃 登科產

紫草 巴塘江卡產

木瓜 乍丫巴塘產

酒 德格巴塘造

醋 巴塘造

西康六畜記

周禮天官庖人掌共六畜六畜六牲也馬牛羊雞犬豕名曰六畜西康番人強半以畜牧爲業牛馬犬羊則皆畜之其雞與豕惟甘孜道場河口裏塘巴塘江卡乍丫察木多等處駐台之漢人塘兵畜之如德格登科白玉稻城石渠雜瑜桑昂各屬皆無也

按番人畜馬而驟則少牛有耕牛馱牛毛牛之分然皆黃牛無水牛羊則毛羊爲多蓋以牛羊其毛可幟帷幙衣服其肉可食而牛乳所作之酥油奶餅亦可食并能割取牛血而食之

番人常以刀割牛肋取血而食而牛仍生惟每年只取一次

牛皮可供用羊

皮可供衣畜犬以守夜打獵并畜貓以捕鼠焉以雞與豕無用故不畜亦不食其肉近年改流亦間有畜者若鵝也鳴也番不惟未畜亦且聞所未聞光緒三十四年秋邊務大臣趙爾豐由雅州購鴨二十隻往巴塘喂養已生卵菹子後因不善養於宣統二年均死焉

西康鳥獸記

鳥獸之名多識者鮮雖二足而羽之謂禽四足而毛之謂獸見其形往往不識其名況西康語文與漢人殊而名稱各別尤為難考茲就所識者約略記之其不識者仍闕焉

鳥類

**鷹** 即爽鳩也古有爽鳩氏之官詩大雅時維鷹揚蓋征鳥也西康各處均有

**鳩** 禮仲春鷹化為鳩古司徒之官為祝鳩氏詩召南維鳩有巢維鳩居之蓋捕鳥也西康各處均有

**鳧** 家曰鴨野曰鶩詩鄭風弋鳧與雁蓋水鳥也乍丁德格巴塘均有

**鴈** 鴈鵠也禮月令孟春之月鴻雁來蓋陽鳥也各處均有

**鴉** 鳥也神黑者曰烏能知反哺也腹白者曰鴉不反哺西康有純白者如人死棄之於山必先白鴉食其睛羣鴉乃食其肉西康各處均有

**鴛** 斷木鳥有大有小有褐有斑巴塘鹽井有之

**鴿** 名鴿德格巴塘乍丁察木多均有

**鵲** 長尾尖嘴黑爪綠背白腹喜鵲也巴塘德格各處皆有

**鸚鵡** 能言鳥也巴塘鹽井均有

**鴿** 鴿巴塘乍丁均有

五十四

**鵲** 土黃色西康各處均有

**鴿** 悍鳥也巴塘乍丁有

**鸛** 水鳥也乍丁巴塘間有

**雉** 巴塘德格有

**鷓鴣** 鳥鼠同穴貫覺三巖巴塘江卡均有

**鷓鴣** 即黃腹雀也又名巧雀又名穢雀巴塘乍丁有

**雀** 穿屋鳥也巴塘乍丁石渠均有

**燕** 巴塘乍丁都有

獸類

**虎** 工布波密產

**豹** 裏塘三巖德格均產

**熊** 瞻對德格乍丁裏塘均產

**狼** 巴塘三巖裏塘均產

**豺** 巴塘裏塘德格產

**鹿** 西康各處均產

**麀** 西康各處均產

**狐** 西康各處均產

**狸** 西康各處均產

**獺** 巴塘德格均產

**兜** 石渠產每隻重四五百觔宣統元年官兵以槍擊獲一隻

**猴** 巴塘鹽井產并有背黑腹白者光緒三十二年鹽井委員令土人捕獲一隻送於邊務大臣

**兔** 巴塘察木多均產

**麝** 形似麋食榲栗麝有香裏塘瞻對均產

**鷲** 野馬石渠產并有野驢其形均與驢馬同惟蹄稍異但腰軟不能乘宣統元年曾經捕獲驗之

**狃** 似猪而小番人名曰雪猪皮可作褥德格登科產

**貓** 捕田鼠之獸俗名野貓巴塘產

**狃** 野羊也德格石渠產

**貉** 似狸銳頭尖鼻斑色毛深

**鼠**

**鱗介昆蟲類**

**魚** 德格石渠巴塘均產

**蠶** 河口產

**蝶** 巴塘河口道塢產

**螢** 巴塘產

**蠅** 巴塘乍丫鹽井三處河口有餘無

**蚊** 巴塘河口道塢得榮有餘無

**蜈** 巴塘乍丫河口有

**蚤** 巴塘乍丫河口道塢有

**蜂** 巴塘三處有

**蛛** 巴塘乍丫道塢河口有

**蝦** 蝦蟇也巴塘乍丫鹽井河口道塢各處均有

西康草木記

易曰天地變化草木蕃至哉坤元順承天而萬物資生天下  
何地而不產草木哉况西北多山多山則草木宜西康在西  
宜乎草木之徧野也然有終年積雪亂石差參無草無木之  
處有盛夏解凍初秋結霜曝少寒多有草無木之處有斧斤  
且日而伐之木已絕其根株牛羊又從而牧之草已莫由繁  
庶但見其為濯濯之處而求草木暢茂惟天惟喬者或百里  
百餘里而一見也周歷旄牛徼外白狼獾薄夷後漢和帝紀旄牛  
徼外白狼獾薄夷  
辛種人  
內屬諸地陟彼岷山莫不嗟草木之無陟彼岷山莫不嘆草  
木之盛平原之間似帛似布似組似綸蘭蕙蒿萊畢呈紛緼

五十六

之象薰蕕茶薺聿發翁蔥之姿九十其特三百維羣皆賴豐  
草而茁壯也巖阿之上蔽日干霄盤根錯節桐梓梧檟皆成  
櫟棟之材松栢豫章概屬輪囷之器宇宙之春河山之蔭無  
非佳木之葱蘢也草之質雖春生而秋死常留滋蔓之本根  
木之葉雖春發而秋凋特立不朽之枝幹蘋蘩菜藻杞梓榿  
楠荐鬼神之馨勝廊廟之任求之中原而不得者皆可於西  
康得之

草類

菊 巴塘產

蘭 巴塘產

艾 巴塘產

茜 江卡乍丫產



芍 瞻對巴塘產

芍 巴塘產

萃 萃勝也巴塘產

萃 車前也巴塘產

苔 巴塘產

苔 乍了德格有

苦 瓜羹也乍了巴塘產

苦 巴塘產

茶 名游冬菜登科巴塘產

茶 香附子也巴塘產

菩 實似瓜可治瘡巴塘產

菩 蒿 蒿草也菜名巴塘產

葫 大蒜也三巖巴塘產

蒿 各處均產

苧 貝母也裏塘德格產

木類

松

栢

五十七

杉

檜 栢葉松身

樅 松葉栢身

西康之木以此五種為大宗各處均產連抱之材終老山林見者皆謂材木不可勝用

橡 巴塘裏塘河口均產

漆 雜瑜桑昂產

棗 酸棗也巴塘德格產

楊 俗名白楊巴塘德格產

柳 巴塘乍了昌都產

梅 巴塘乍了產

榆 昌都產

枳 巴塘產

柘 柘也檀也河口產

棠 棠梨子也巴河產

楂 酸楂也巴塘河口道場產

椿 桑昂雜瑜產

樺 甘攷德格產

槐 巴塘產

桑 河口巴塘產

楮 皮可搗為紙桑昂雜產



論西康省邑



西康建省卜省邑說者曰古者宅中圖治周遷於洛邑自服於土中蓋居中則四方貢賦道里均焉宅省之義與宅都同應擇適中之地相其陰陽觀其流泉而經營城郭查康地之同普縣東距打箭鑪不及二十程西距丹達山亦十數程南北相距尚均乃西康之中央於此而擇平原寬廣材木便利之處建設省城省者察也居中而察視四方無過無不及不亦善乎不然取建邦設都必憑險阻之義城池者人設之險阻山川者天設之險阻察木多地方左右有河流至前面而合後面崇山屹立天然險阻免修城郭且爲入藏阨要之墟地雖稍偏西北不過數日程相去不甚遠亦可爲省邑否則貢覺地方平坦亦多水雖淺而土甚厚宅省亦可邊務大臣曰同普中則中矣而可牧之地多可耕之地少官也兵也商賈也農工也聚處於斯無以爲食四遠購運移粟養人非長久計察木多險則險矣而可爲城邑之地過於狹隘僅可容人千戶仍須遠購糧食地雖扼要遇有變亂糧不能購則要亦難扼何可爲省邑乎貢覺雖有寬平之區而與同普察木多地皆高寒產青稞而不產麥秋成亦晚常受霜災受災之糧不能衛生况平原水淺不能流惡積污久而水化其味飲之易致疾癘亦不可爲省邑康地數千里惟巴塘一區氣候

和暖產糧亦豐建城之所可容數千戶左右兩小河繞城急流西有金沙江東有大朔山南北亦層巒疊嶂可稱天險以地偏南微有不足人意耳而卜宅於此招商開埠一年成聚二年成邑三年成都可以預卜縱人衆食多巴塘之糧不敷則得榮鄉城鹽井江卡三壩白玉皆可接濟若將金沙江疏導則登科德格三巖之糧載運而下一水之便爲永久計仍非巴塘宅省不可

按西康地方平原者非高寒不產百穀即偏於一隅如裏塘平原而高寒也甘孜平原而偏於東也稻壩江卡偏於南登科石渠偏於北均不可宅省而貢覺察木多巴塘三

處以扼要論則察木多爲宜以平原論則貢覺爲宜以足食論則巴塘爲宜

西康自東至西地名路程

西康與四川於折多山頂分界西康程站應由折多山頂  
叙起而打箭鑪為折多山之來路由打箭鑪起程五十里  
至折多塘設有驛站塘三十里至山腰有旅店二十里至山  
頂特一并叙明

折多山

由折多山頂起赴察木多有兩路一由道瑪廿致德格係小路一由墨塘巴塘乍丫係大道茲先叙大  
道路程由折多山頂下破十五里至

提 茹

無柴有塘兵旅店平行三十里至

安良壩

無柴有居民七八戶平行三十里至

營官寨

有林木有居民七八戶有旅店平行三十里至

東洛俄

有塘兵有林木居民二十餘戶平行二十里至

山根子

有林木旅店上坡下坡六十里至

臥龍石

有林木有旅店塘兵居民三十餘戶五十里至

八角樓

有旅店居民三四戶五十里至

河口縣

有把總宣統三年春裁撤有塘兵旅店居民百餘戶新設河口縣由此渡鴉龍江五十里至

麻格仲

有林木有旅店居民五六戶上坡下坡四十五里至  
麻格者番人老嫗之稱也仲者村隘也一作縱義同

剪子灣

有旅店塘兵上坡十里至

博浪工

前駐有外委宣統三年春裁撤有林木下坡平行三十里至

西俄落

有林木有旅店居民十餘戶上坡平行五十里至

咱馬拉洞

有林木旅店塘兵平行上下斜坡二十里至

千把頂

有旅店上下斜坡三十里至

火竹卡

有旅店三十里至

腰卡子

又名火燒坡有旅店三十里至

裏塘

前設有守備千總把總宣統三年春裁撤原設糧員改為興化廳同知管理地方有居民二百餘戶平行二十里至

按打箭鑪至裏塘六百四十里有行十日者有行八日者有行七日者大抵秋間烏拉肥壯可趕站冬春不能速行也沿途旅店乃光緒三十三年邊務大臣修建

大橋

有旅店過橋三十里至

頭塘

有旅店無柴三十里至

乾海子

有旅店無柴平行下坡四十里至

拉耳塘

有林木有塘兵旅店順溝行三十里至

喇嘛丫

有居民五六十戶上下坡四十里至

麥甘多

有居民四五戶住充公房屋平行二十里至

二郎壩

有林木有旅店居民二戶上下坡平行六十里至

三壩

有林木原係裏塘巴塘交界之地新設三壩廳通判駐此上下坡五十里至

松林口

有大林木無人戶三十里至

大鎖塘

有塘兵旅店居民七八戶上坡下坡八十里至

奔察木

有大林木有旅店居民四五戶下坡三十里至

小巴冲

有林木有居民六七戶下坡四十里至

巴塘

原有都司千總把總宣統三年春裁撤原設糧員改為巴安府管理地方有居民三百餘戶平行過小山四十里至

按裏塘至巴塘五百里有行七站者有行六站者五站者

沿途旅店乃邊務大臣所建

牛古渡 有居民二三百五十里至

按此處有小路過貢覺乍丫宣統三年新開之路由牛古

渡上山三十里至喜松工 巴塘至此一 八十里至熱喜松

多 無人 七十里至雍西 無人 五十里至支巴 有人 六十里

平行至孔衢達 無人 六十里平行至孔撒 有人 宣統二年 熱水

務大臣駐 三十里至貢覺 有官寨人戶新設 七十里至

菊麥 有人 八十里至乍丫 有人

竹巴隴 有居民四五十戶原設外委一員宣統三年春裁撤由此渡金沙江四十里至

公拉 有居民數戶四十里至

空子頂 有樹木有居民十餘戶五十里至

莽嶺 又名巴木塘有居民十餘戶六十里至

南墩 江卡屬有居民廟宇四十里至

古樹 有人戶四十里至

普拉 有人戶六十里至

江卡 有居民數十戶原設有守備把總各一員宣統三年春裁撤新設江卡委員駐此五十里至

按巴塘至江卡計四百二十里

山根 上下雪山七十里至

梨樹 有林木有居民十餘戶原設外委一員宣統三年裁撤過漫坡五十里至

阿拉塘 有居民上下小山五十里至

石板溝 原設把總一員宣統三年裁撤有居民有林木上下大山七十里至

阿 足 乍丫屬原設把總宣統三年春裁撤有居民二十餘戶過漫山又渡河五十里至

噶耳塘 平行上山五十里至

洛加宗 有居民十餘戶四十里至

俄倫多 有居民四十里至

乍 丫 有居民百餘戶原設有守備把總各一員宣統三年裁撤新設乍丫理事官三十里至

按江卡至乍丫四百七十里

雨 撒 過大雪山上下六十里至

昂 地 有人戶原設把總宣統三年裁撤三十里至

噶 卡 有居民二十餘戶上下大雪山六十里至

王 卡 有居民二十里至

三道橋 過山三十里至

巴 貢 有人戶上下大山八十里至

包 墩 有人戶過大小山六十里至

猛 堡 有人戶過大山五十里渡河至

察木多 又名昌都居民二百餘戶原設有游擊千總把總宣統三年春裁撤原設糧員改為理事官四十里至

按乍丫至察木多計四百二十里

按巴塘由江卡乍丫至察木多計一千三百一十里有作

十六站十五站十二三站者

俄落橋 有人戶平行三十里至



浪蕩溝 二十里至

裹脚 上山平行七十里至

拉貢 有人戶二十里至

松羅橋 上山四十里至

恩達寨 二十里至

恩達塘 有人戶原設外委宣統三年裁撤二十里至

拉貢山 二十里至

牛糞溝 寨木多屬過大雪山六十里至

瓦合塘 有人戶二十里至

瓦合寨 類伍齊屬有人戶四十里至

麻利 有人戶過山四十里至

嘉裕橋 有人戶上下山三十里至

鼻奔山根 有林木四十里至

洛隆宗 洛隆宗屬過山六十里至

鐵凹塘 有人戶十五里至

曲齒 有喇嘛寺四十里至

碩搬多 有居民百餘戶原設千總外委宣統三年裁撤平行四十里至

忠義溝 四十里至

巴里郎 有人戶過大山五十里至

索馬郎 四十里至

拉子

又名拉孜又名納子有人戶四十里至

邊壩

即達隆宗有人戶五十里至

丹達

此處有察木多屬地有人戶十五里至

魯貢拉

即丹達山頂

按察木多至丹達山頂計九百里有作十一二站有作八九站者由此至前藏拉薩尙有一千三百餘里

西康折多山頂由道塢德格至察木多地名路程

折多山 由山頂起七十里至

長壩春 有居民十餘戶五十里至

中谷 又名仲惡一作縱鄂番人謂村為仲謂頭為惡猶言村頭也縱鄂亦此意有居民五十里至

八美 有居民距秦雷十五里產沙金五十里至

結色中 有居民五十里里

松林口 有官寨一座五十里至

札巴 又名夾壩四十里至

道塢 有居民二百餘戶新設道塢委員四十里至

按折多山頂至此三百六十里

將軍橋 有居民六七戶此處分路至瞻對官寨計兩站由將軍橋六十里至

仁達溝 有人戶六十里至

窪絨 有人戶四十里至

章谷 即鐘窰屯改為章谷委員五十里至

按道塢至章谷二百里

當科 有人戶五十里至

倬倭 有居民三十餘戶六十里至

普玉龍 有人戶四十里至

甘孜 有居民百餘戶新設甘孜委員駐此四十里至

按章谷至此計二百里

白利 有居民二十五里至

林葱 有居民二十五里至

絨壩擦 有居民四五十戶六十里至

浪多 有林木無人戶五十里至

玉龍 有頭人寨六十里至

墨卡 無人戶六十里至

山根子 又名乾海子無人戶過灑拉雪山八十里至

蠻瞻統 有居民喇嘛寺五十里至

擴絡塚 又名窟隆洞此處分路赴登科府有居民十餘戶四十里至

大馬洞 有居民三十里至

德格 即更慶新設德化州駐此三十里至

按甘孜至此四百八十里

龔垵 有官寨居民四十里至

岡拖 在金沙江河西岸有居民五十里至

艾壩 又名矮有居民五十里至

絨松 有居民四十里至

花坭 有居民四十里至

仰大 三十里至

打紫 有居民三十里至

卡工 有居民二戶官寨一座新設同普縣距此不遠五十里至

納奪 無居民七十里至

覺雍 無居民五十里至

白里 無居民察木多屬四十里至

拖巴 有喇嘛寺三十里至

額拖卡 無人戶四十里至

熱堽 有人戶過熱堽雪山四十里至

麻柳坪 有人戶四十里至

察木多

按德格至察木多六百七十里

按折多山由甘孜德格至察木多計一千九百一十里

西康由南至北地名路程

碧油工 康滇交界之處一百二十里至

鹽井縣 新設鹽井縣有居民四十里至

覺隴 有木林人戶過雪山一百里至

宗巖 有人戶八十里至

甲乙頂 有人戶過大雪山六十里至

莽嶺 又名巴木塘有人戶五十里至

空子頂 有人戶四十里至

公拉 有人戶四十里至

竹巴隴 渡金沙江有人戶五十里至

牛古渡 有人戶四十里至

巴塘 巴安府有人戶四十里至

按碧油工至巴塘六百二十里

黨村 有人戶四十里至

札拉 有喇嘛寺五十里至

邦喜 又名茂場喜有人戶五十里至

龍將喜 六十里至

札馬 有官寨係白玉委員張敏新建五十里至

德萊 此處分路過三巖雄松只二站由此五十里至

蓋玉 有人戶官寨一百里至

測溪喜 四十里至

絨學 四十里至

白玉 白玉州在此自此過雪山名海子山夏日大雪六十里至

按巴塘至白玉五百二十里

貢當喜 無人戶三十里至

噶拖寺 有寺院四十里至

河坡 又名合坡有人戶六十里至

按此處分路七十里至惹加有人六十里至贈科有人

百二十里至襪色科無人八十里至絨壩擦有人九十里

至甘孜

冷學 有人戶六十里至

杜學 有人戶六十里至

岡沱 有人戶四十里至

龔壩 有人戶有大官寨三十里至

德格 即更慶新設德化州駐此三十里至

按白玉至德格三百八十里

大馬洞 有人戶四十里至

擴絡塚 有人戶七十里至

色拉 無人戶七十里至

靈葱 有土司官寨人戶八十里至

郎吉嶺

有喇嘛寺六十里至

登科

新設登科府駐此有人戶過恩科山八十里至

按德格至登科二百五十里

新店子

無人戶由隴緘溝翻山前進宣統三年邊務大臣修有官房八十里至

菊母

有喇嘛寺有官房五十里至

石渠

又名色許即雜渠卡有喇嘛寺新設石渠縣駐此

按登科至石渠二百一十里

按由石渠經俄落至甘肅界二十二站計二千里已查有  
程站今忘之又由石渠赴西甯辦事大臣處亦二十七八

站



附成都至打箭鑪程站

成都里四十 雙流里六十 新津里四十 斜江河里六十 邛州里五十 大塘

舖里五十 百丈驛里五十 名山縣里四十 雅州里五十 觀音堡里六十 榮

經縣里六十 黃坭舖里四十 大相嶺里十五 清溪縣由縣出西南門走

西康里二十五 富莊里四十 坭頭里三十 林口里二十 飛越嶺里十五 化林坪

三里十五 冷磧里四十 鑪定橋里四十 大烹壩里三十 瓦期溝里四十 柳楊

三里十五 打箭鑪

按成都至打箭鑪九百六十里由打箭鑪巴塘至丹達山  
三千三百五十里

附丹達山至前藏拉薩程站

丹達山下里三察洛松多里五十郎吉宗有八里大窩里五十阿

蘭多有三十里阿蘭卡里三十甲貢里四十大板橋里四十多洞過七十里

擦楮卡里五十拉里有官寨四里阿雜有三十里錯番人錯七

山灣有五十里常多有六十里甯多有四十里拉松多里四十江達

有五十里順達有九十里鹿馬嶺有一百里堆達有五十里烏蘇江有

十戶仁進里有六十里墨竹工有四十里拉木有五十里占達塘十三

里 德慶有二十里拉薩喇嘛前藏駐糧員駐此

按丹達山至前藏拉薩一千三百六十里或作十四站或

作十六站

附前藏至後藏路程

拉薩四十里登龍岡四十里業黨四十里僵里五十里曲水五十里

岡把擇四十里殺馬隴五十里白地五十里打魯五十里

浪噶子五十里翁古六十里熱隆六十里巴浪六十里

谷洗六十里江孜五十里仁進岡五十里

春推四十里札什倫布四十里

按前藏至後藏八百四十里此係商人塘兵開報路程又

前藏至廓爾喀二十八站

按前藏拉薩之南方十八站至大吉嶺又名多吉嶺查大

吉嶺地方連哲孟雄部落西連廓爾喀東連布魯克巴為

印度入藏之孔道原係藏人種族自立部落現為英人經

營鐵路至此由此乘火車一日可到噶哩噶達即東印度

之曰披楞由噶哩噶達乘火輪船十六日到香港由香港乘輪

船六日到上海由上海乘輪船三日夜至漢口由漢口乘

輪船四日夜至宜昌由宜昌乘輪船由重慶乘輪船

六日夜至重慶由重慶乘輪船由重慶乘輪船

成都

一西康巴塘至四川成都省二千一百里

一西康巴塘至前藏拉薩三千五百七十里

一西康巴塘至雲南省城計三十五站

一西康巴塘至西甯計四十餘站

一西康巴塘至甘肅蘭州省計五十餘站

西康百工記

軒轅氏作器用而工匠興焉金天氏則立五雉爲五工正矣陶唐氏則允釐百工矣有虞氏則命垂作共工矣有殷之制天子六工曰土工金工石工木工獸工草工典制六材至周而太宰以九職任萬民五曰百工飭庀八材三代以上曲藝多能之流同在命官之列迨後世而官自官工自工矣雖有專家而居位臨民者往往下視飭材辨器之輩豈知經邦濟世百工與有力焉耶西康工匠較之內地固不齊而土金石木各工無論巧者拙者勤者惰者要皆制國用通物理便人情工用相得神明變化而進乎道也

土工

埽埴之工有陶人族音倣人之別然陶人爲甌族人爲簋皆合土爲器查德格地方有造土罐者巴塘地方有造土鑊者碩搬多亦有此工惟巴塘之工不精所造之器髣髴薛暴者多宣統元年邊務大臣趙爾豐僱碩板多之陶人以教巴塘陶人而鑊器得以改良焉至於造簣造庾造鬲造甗造甓造瓦之工俱無近年巴塘修建房屋始由內地僱匠造甗瓦焉至爲垣墉飾黝堊之工番地多矣

金工

金有五金攻金之工亦衆如爲削爲戈爲劍爲鐘爲甬爲鐃

此特攻黑鐵之工也西康鐵工有削戈劍鑄之工無鐘工舖工用舖遠購雲南鐘則無之至於青鉛番人但以之爲彈赤銅白銀則造怨造杯造壺造鈴以及造婦女首飾造佛像並有將銅造鍋造缸重百餘斤者至黃金一項但造首飾及鍍神像器用番地有此工也

矢人

番人用箭故有矢人

函人

番人用盛鎧故有函人

按番人鐵工只能造戈矛刀劍火鎗鑄刻圖章之類不知

二十

造農器者以耕種之法與漢人不同故不能造

石工

攻石之工刮磨者有五而西康地方惟德格有能治珊瑚珠者如造石橋石城石屋石墓石碓石碾之類皆無其工番人石工但能造石磨并於石上鐫梵經字而已

木工

攻木之工有七而輪人輿人西康蔑有以無車故也造房屋之工番人之房土築者多木工草率若用良工必由內地僱往至雕刻之工或象人象獸象禽象蟲象草木均能爲之至建國營國爲溝洫之匠番地未之有也

弓人

番人戰鬥用弓故有弓人

獸工

獸工者所以辨百獸之名識百獸之性而攻養猛獸西康番人無此工

草工

草工者所以別百草之類而殺草西康番人無此工

皮工

攻皮之工有五西康番人雖衣裘用革而無專工光緒三十四年邊務大臣始設製革廠由外洋購機器興辦製造兵式

二十一

靴鞋鞍轡等類

衣工

縫衣之工康地雖有只能縫番人之衣不能縫漢人之衣

骨工

骨角之工康地番人但能以獸骨作戲具以人頭骨作盃

竹工

治竹器之工康地無竹惟嶺嶺雜產未用筲簞故無竹工

染工

番人服色喇嘛尙紅黃故有染工

畫工

繪事一端番人重之如人與鱗介鳥獸山水草木均能畫之



番人卜筮記

龜爲卜著爲筮聖人以下筮使民敬鬼神信時日畏法令也故曰定天下之吉凶成天下之亹亹者莫大乎蓍龜而番人卜筮不用蓍龜以木珠或珊瑚珠一串由右額而比至左額數有若干珠以推測之卽爲卜筮無論大事小事皆謀及卜筮以定吉凶焉然蓍龜卜筮如左氏所載晉文卜遇阪泉之兆而勤王之功成秦穆筮得狐蠱之占而戰晉之事勝此卜筮而驗者也然桑林不足以害晉河神不足以禍楚此卜筮而不驗也番人以木石之珠而推測亦有驗有不驗謀及乃心謀及卿士謀及庶人謀及卜筮人謀三而鬼謀一番人卜

筮其知此道焉否

按番人卜筮惟喇嘛善其事聞光緒年間巴塘正土司羅進寶寨內有一小花池土司欲於花池處造房以爲諷誦梵經之室求喇嘛卜之喇嘛曰毀花池而造經堂不利於土司土司弗信鳩工庀材而造室喇嘛曰後有乘紅馬者至則巴塘土司亡矣土司曰黃馬白馬黑馬紫馬烏馬各色均有惟紅馬無之紫馬可謂紅馬乎喇嘛曰紅馬非紫馬也土司曰馬有紅色乎喇嘛不復言迄屋落成尙未塗丹牘光緒三十一年巴塘卽有戕害鳳大臣之事土司伏誅番人以土司親戚立爲土司嗣建昌道趙爾豐至遂將

巴塘改流土司至此滅焉番人屢以喇嘛之下爲言惟不知乘紅馬者爲誰嗣聞趙以丙午生卽謂丙屬火火色紅午屬馬卽紅馬也人皆以爲卜之驗焉

光緒三十一年冬官兵由巴塘往攻鄉城令番人應僱烏拉番人問卜於喇嘛喇嘛曰官兵勝但須明年夏間乃可鄉城稻壩之喇嘛亦自卜則曰官兵不勝遠來糧絕難久持必退去嗣於光緒三十二年閏四月十八日官兵始克鄉城所卜夏間勝者驗也而卜官兵不勝者不驗

光緒三十四年藏人率兵來佔西康鹽井地方駐藏大臣聯豫飭察木多糧員李方愨同藏兵往鹽井人民驚惶康

地文武官吏電稟護川督趙爾豐謂李糧員率藏兵佔鹽井趙電飭將李押候參辦有一喇嘛持一梵字書往問李曰剖本番人辭屬狗乎李曰然汝何以知之喇嘛曰前代喇嘛遺書謂屬猴之年藏兵至鹽井有屬狗之漢官同來必罷職本年戊申屬猴此乃數定請勿怪李索書而閱確係舊書惟不識梵字未考其詳

宣統元年德格土司欲獻地改流遣人往登科所屬地方問於坐靜居無喇嘛喇嘛回書曰獻地改流土司可得漢官番地之人惟德格土司之官可得大者前代喇嘛遺書云屬猪之年土司地方皆爲大皇上收去不待收而

即獻之必得官若俟收去則官不能得也德格土司從之  
得二品銜世襲都司迄宣統三年春民政部奏准將各省  
土司改流設官西康土司均改流焉而是年辛亥即屬猪  
也術數之學豈得盡謂之誣歟

說番人採礦

宣統元年己酉歲德格土司獻地改流邊務大臣趙爾豐委員採辦金礦銅礦番人訴於趙曰礦爲鎮山之寶若採之百姓不利聞之前代現在採金採銅之處蒙古人曾經試辦無效爲土人阻止請土司封禁永遠不採若漢官果是愛民仍請封禁民之福也感恩無極趙曰地不愛寶寶藏興貨財殖始可以福民即漢官之所以愛民也金之爲用汝等繕梵經鑲佛像飾棟梁以及婦女首飾皆用之至於銅也鑄神像造刀槍作瓢作碗以及馬上之環鏡亦無不用之若人皆以爲鎮山之寶阻止採辦將何以爲用歟汝等需用金銅不惜重

資購自遠方而產之本地者反不取用利於人而不利於己也若謂採取鎮山之寶百姓不利何以打箭鑪瞻對毛丫裏塘秦甯常採金礦察木多地方亦採鐵礦未見百姓不利富者因礦益富貧者以備而謀衣食盜賊潛消地方安寧因地之利而利民不言利而利自大矣而民焉有不利者乎番人曰縱謂採礦有利於民而土人不諳採法官招漢人採辦不過利漢人而已漢人之來每與土人滋事土人仍不利請停辦趙曰土人不知採法官僱漢人而採之仍僱土人幫採土人知其採法即可自辦若漢人滋事有官治之可勿慮番人曰昔蒙古人辦礦已無效今若辦而無效不又虛費款項乎

趙曰爲歛項計誠然而委員查勘僉云可辦姑試之若無效  
卽停止至汝等言鎮山之寶探之不利於百姓其說誤矣汝  
等不可阻番人唯唯而去乃得探礦

說番人讀書

宣統三年辛亥六月臆對收回設官治理其地番人面懇川督趙爾豐曰漢番語文不同上下通情端賴翻譯求飭地方官慎選翻譯以免百姓受累趙曰此事甚難我欲使地方官學番語而番人之語臆對與石渠不同石渠與巴塘不同又與三岩不同學之不能通用且官三年一換此官能番語換一官又不能通終於汝等無益奈何番人曰現在各處設學堂若只教漢語臆對亦可興辦趙曰只學語言不學文字若有文告何能知之番人曰官之文告仍用番文趙曰繙譯舞弊不但言語文字舞弊更甚文告用番文汝等仍須學番文

而始知之何不棄番文而學漢文耶番人曰聞漢文難學且聞現在學漢語漢文之子將來皆調往四川當兵所以不願學趙曰汝等謬矣四川幼子多矣求當兵而不得何用番童乎設學堂令汝等學漢語漢文者以改流之後百姓可與官長直接辦事免受繙譯之累且可以知禮義明教化即可以爲官汝等語文不通數千年來只知土司呼圖克圖永遠爲官而不知改流之後能通語文凡有賢能均可爲官漢人可爲番人之官番人亦可爲漢人之官則漢番不分也汝等有子何不望之發達而令長爲農夫牧豎哉番人曰讀書者盡可爲官歟趙曰讀書雖不能盡爲官猶汝等之誦梵經者不

能盡當堪布而堪布必於能誦梵經者選之番人曰然則學  
堂之設開我等自來未有之榮也請設學堂我有子弟可以  
讀書

說番人弟兄同妻

宣統元年己酉七月德格土司獻地改流邊務大臣趙爾豐於石渠召集番人而告之曰今者德格改流汝等歸漢官管理糧稅已爲汝等減徵差徭已爲汝等裁革甚望汝等發達惟汝等戶口太少究厥由來半由好爲喇嘛半由弟兄共娶一妻之故以後須學漢人無論弟兄多寡一人各娶一妻番人曰弟兄各娶一妻生人衆多衣食難謀不將流爲乞丐而不能求飽煖乎趙曰有地可耕有山可牧何患乎無衣食番人曰聞內地漢人極多難謀衣食所以當兵遠來番地尋羊皮以衣尋糶糶而食人多亦太苦矣甯取其少無取其多趙

曰汝等之言謬矣番地苦寒所衣者羊皮所食者糶糶而已內地無所不有誰願遠來番地乎當兵者因食糧餉國家立有軍法官長強迫之不得已而遠來未衣羊皮是以布帛爲美也非無衣而來尋羊皮所食糶糶是因運米不及也非無食而來尋糶糶汝等衣食皆爲漢人所不取漢人方笑汝等惡衣惡食汝等反謂漢人無衣無食漢人則嫌汝等人少汝等乃嫌漢人人多情之相反由於理之未明汝等何不思衣食由人而生多一人可以多牧可以多耕衣食即由耕牧而出也汝等以人多爲嫌如石渠俄洛爭鬥當其打仗之時願人多乎願人少乎人多者勝乎人少者勝乎番人曰多者勝



趙曰然則人少牛羊被人奪財物被人劫地土被人占生命亦時虞不保爲害之大汝等已明之何得尙爲人少計必欲弟兄同妻哉況人所以異於禽獸者以其知禮義也禮義者何如汝等尊官長孝父母此即禮義也至於弟兄長幼有序長者爲長幼者爲幼不亂其秩序也兄之妻即如兄弟之妻即如弟若弟兄同妻則長幼之序亂矣長幼之序亂則不知禮義矣不知禮義則與禽獸無異矣與禽獸無異則雞犬矣夫雞犬其生命至賤爲人宰殺之物故漢人有弟烝兄嫂兄姦弟婦皆治以死罪番人驚而言曰蠻人愚蠢不知此禮弟兄同妻世世相傳以爲弟兄和睦生產亦少免致窮餓茲聞

此言漢官之刑罰過嚴矣今歸漢官管理百姓之弟兄同妻者甚多有年老者有中年者有少年者若漢官治之死罪不亦慘乎趙曰從前之事一概免究以後弟兄各娶一妻可也番人曰弟兄不可共一妻兩女可共一婿乎趙曰兩女一婿漢人間有之然皆不平之事仍以一夫一妻爲合番人曰漢人兩女一婿治死罪否趙曰不治番人曰番地之俗弟兄共一妻者多兩女共一婿者少人猶以爲不平漢人弟兄共妻而治死兩女共婿而無罪平乎不平趙曰我先已謂爲不平矣漢人近年亦漸改良汝等弟兄共妻之事宜除兩女共婿之事亦宜改現在漢人來番地結婚者多我曾出示曉諭無

論軍民須家無妻室取保具結向地方官購領婚書始准娶  
番女爲妻若其回籍仍令偕行不准棄而違之此即禁漢人  
之兩女一壻也番人曰告示已見矣必如是而後可以爲平  
趙曰汝等既知其平以後宜切實行之使漢夷同風我之深  
願也

說番人葬親

西康改流邊務臣大趙爾豐謂番人曰番地人少訪問其故有人謂汝等風俗不愛子之事有三焉孩提之童若出戶庭或被飛鳥啄其眼或被走獸噬其身父母雖親見其情並不驅逐鳥獸忍視其子之肉爲鳥獸食一也其居處近水之人孺子無知有時匍匐將入於井外人見之故不救父母見之亦不救二也家中有火所以爲炊童稚之子急於飲食加薪而爨火焰燎衣兒童號泣父母聞聲往視但撲竈中之火免其燬室不滅衣上之火致使其子焚身三也汝等之子罹災天亡者多是以人少如人言不虛汝等亦太不仁也番人曰

此乃謠言禽獸有子尙知愛之豈有人不愛子之理家中有子時恐其爲雞犬傷湯火傷也決無遭鳥獸之害蹈水火之危而不救者趙曰謠言本不可信而說者謂因爲父母者不愛子故爲子者亦不愛父母汝等愛父母乎番人曰愛趙曰旣愛矣何以父母之死汝等以之喂禽而稱爲天葬以之擲河而稱爲水葬以之焚化而稱爲火葬耶必係汝等之父母不愛於汝故汝等以仇報父母也豈有父母愛子而子不愛父母乎番人曰生死不同父母已死何得不葬趙曰葬則葬矣漢人葬親衣衾棺槨以歛之擇他日不爲城郭不爲溝池不爲井窰能永久不動之地以葬之封其墳墓歲時伏臘且

墓祭焉父母雖死子孫不忘汝等天葬水葬火葬是父母死後即忘父母之恩也且視父母爲讎也不仁莫此爲甚番人曰凡人有恩於人無論其人之生也死也受恩者之愛戴永遠不忘何況父母不過番人愚蠢不知漢人葬禮祭禮其不忘父母之心一也趙曰然則漢人之葬與祭由不忘父母之心發見而爲不忘父母之禮汝等願學乎番人曰今而後始知漢人之葬父母祭父母是不忘父母也吾儕有其心而無其事故人以爲忘父母讐父母甚矣心之必見於事也自此而願學葬祭之禮

說番人墾荒

光緒三十二年丙午戡定巴塘裏塘邊務大臣趙爾豐諭番人墾荒三年之後升科納糧番人曰未墾之地乃神山也山有神動之則雨暘不若刀兵立與疫癘必起是以土司歷代封禁之不耕種免牧畜止打獵阻采薪光緒三十年鳳大臣於巴塘墾地次年收穫不豐官軍來討疾病亦衆前車可鑑何敢蹈轍趙曰神若在山則無山不有汝等已耕已牧已獵已薪之山無神而未耕未牧未獵未薪之山有神何以見之番人曰前代大喇嘛所言也趙曰前代大喇嘛言神在山彼應在山祀神而修造寺院鑄畫偶像何爲哉番人曰神靈氣

也可在山亦可在寺寺有偶像神有時而憑依依故大喇嘛在寺祀之趙曰神即可在山可在寺當神出寺入山之時大喇嘛祀如未祀也人若耕其山神即居其寺人得粒食神享馨香大喇嘛亦不虛祀豈不美乎況汝等祀神並未在山皆入寺而設殺饌對偶像而拜跪大喇嘛何不告汝等向山祀神而待汝等入寺祀神耶神山之說大喇嘛之欺汝也光緒三十一年巴塘歲時不熟天災也干戈之動人召也疾疾之作時氣也以墾荒而謂神降之禍不亦誣神乎神聰明正直而壹者也人爲不善神乃殃之巴塘阻墾戕害大臣行爲叛逆所以留害並至况巴塘未墾之先番地時有旱災霜災請發

巴塘之倉以賑濟而裏塘土司曾與崇喜土司鄉城喇嘛打  
仗光緒二十二三年間漢兵亦攻鄉城攻三巖攻章谷倬倭  
瞻對汝等男女老幼亦有上千和氣或呻吟或死亡甚至地  
震巴塘道塢乍了等處百姓喇嘛被礮房坍塌壓斃者不少  
迄今而蹢跚者尙有之此又何說番人曰以此而論誠非墾  
荒之過俟與衆人會議即備畚鍤而闢土地

說番人喇嘛

光緒三十二年丙午歲秋八月邊務大臣趙爾豐至裏塘番民喇嘛迎之趙問番民曰查各處丁口冊籍農民十分之三喇嘛十分之二婦女十分之五男子之好爲喇嘛何也番民曰土司頭人差徭太重凡屬農人均須自備口食輪流當差惟喇嘛不當差故皆樂爲之趙曰喇嘛不當差朝夕誦梵經誰人供其衣食乎番民曰喇嘛寺有地土徵糧有資本生息且人之或病或故延喇嘛誦經皆厚賂之並有將家財全納於寺者喇嘛寺所以致富廣收徒衆三年一次查看人家有幼子即令分送寺中故喇嘛人數與居民相上下趙曰人爲

喇嘛故由差徭迫之然亦人之貪財好惰也中年爲喇嘛者係自貪惰幼年爲喇嘛者係爲之父母者貪惰而使其子習爲貪惰也貪財而惰固好爲喇嘛夫喇嘛固可以坐誦梵經並不勞力卽得人之財得財而無子嗣所得之財歸喇嘛寺享受雖得猶之未得也汝等何不願有子嗣耶番民曰人誰不願有子嗣若人盡爲喇嘛而不耕牧則喇嘛亦無衣食人盡耕牧而不爲喇嘛則人死何能超昇所以半爲喇嘛半事耕牧也趙曰汝等所謂超昇者是謂已死之人成神而不轉世乎抑謂其轉世而爲人乎番民曰成神而不轉世無人知其爲神須轉世爲人如呼圖克圖之爲活佛也趙曰呼圖克

圖轉世乍丫四五人察木多四五人巴塘只數人裏塘只數人德格亦祇十餘人皆謂係原爲呼圖克圖者轉世如汝等之說他人亦可轉世爲呼圖克圖也番民曰不能轉世爲呼圖克圖超昇而生於富人之家亦可趙曰欲生於富人之家番地富人無幾不過徒有思想而已縱有富人之家能生與否亦未可必汝等之子半爲喇嘛半事耕牧豈爲喇嘛者死可超昇而耕牧者不超昇歟况喇嘛不婚娶已絕人超昇生路耕牧者若遇飢饉疾疫刀兵而死吾恐喇嘛無超昇之處呼圖克圖亦無轉世之所也自滅種族寧不惜乎番民曰能生富人之家與否誠不可知滅種真可惜也請飭喇嘛不准

三年清查令人之幼子爲喇嘛趙曰今者地方改流差徭已免雖用烏拉係以價僱無慮當差汝等不以幼子爲喇嘛若喇嘛寺逼令汝等可控官而治之罪趙又問喇嘛曰汝等禁人打獵免傷生命慈悲之心可嘉喇嘛曰所以爲喇嘛者惟此慈悲之心也禁人打獵乃分內事耳趙曰鳥獸之命與人之命孰重喇嘛曰人命重趙曰人命少者重多者重喇嘛曰多者重趙曰人命既重殺人者有罪否喇嘛曰有趙曰用木用石用刀殺人者有形之殺人知其有罪而未嘗用木用石用刀殺人而無形之殺人殺一人猶殺數十數百人有罪否喇嘛曰無形殺人若用毒藥殺一人只計一人惟殺孕婦



殺一人亦只計二人能知其用藥之由得其實據則用藥者有罪若殺一人猶殺數十數百未之見也趙曰不用藥而無形殺人且殺之多者即汝等也喇嘛曰并無其事趙曰汝等三年一次令人以幼子爲喇嘛爲喇嘛者汝等雖未治之死而不令婚娶多一喇嘛即多一無夫之女使男女均無後嗣雖未見殺一人而實殺人多矣汝等之殺人亦巧矣有罪耶無罪耶喇嘛曰番人愚蠢此言聞所未聞也自來喇嘛爲大皇上誦經祝朝政興旺大皇上未以爲罪趙曰大皇上定章大寺喇嘛不得過五百所謂大寺指藏中四大寺而言也以外不得謂之大寺今裏塘寺之喇嘛數千若大皇上知之能不勉強趙曰能如此則善矣

西康物異辨

伏羲之世龍馬出於河軒轅之世麒麟遊於囿此不嘗見之獸自古以爲祥瑞也而嘗見之獸生而異形者不得爲祥亦不得爲妖光緒三十二年西康之河口地方獵者得鹿頭僅一角或曰妖或曰祥識者曰此獸角也何以妖祥論哉而是一年攻討鄉城官兵糧食乏絕購一牝牛宰食於腹內得一胎牛兩頭兩尾人曰妖也不可食而兵竟食之無恙宣統元年官兵攻克雜渠卡得一已死小牛形若兩牛只口腹相連邊務大臣趙爾豐同官弁等均詳視之係兩牛合抱而腹相連口相對兩頭兩尾八足四眼四耳四角毛色均黑詢之番人

稱係生而如是因口對唇連不能乳故死焉人曰妖也昔鄉城有兩頭牛而鄉城敗今石渠有合腹牛而石渠敗趙曰非也此不過生物之失其常耳雖云和氣致祥乖氣致戾國家將興必有禎祥國家將亡必有妖孽而宋之五石六鷁內史叔興以爲陰陽之事非吉凶所生魏安平太守王基筮於管輅輅曰君家有三怪一則生男墮地走入竈死二則大蛇牀上銜筆三則烏來入室與燕鬥兒入竈者宋無忌之妖蛇銜筆者老書佐之妖烏與燕鬥者老鈴下之妖此三者足以爲異而王基之家卒以無患國家禍福冥不可知豈可以異物論休咎哉古來鳳凰惟治世乃見然漢桓帝靈帝之時鳳凰

屢見亦非治安之世斬蛇夜哭之事在秦則爲妖在漢則爲祥可知妖祥之事由人擬議區區異牛何足論吉凶歟若異牛果爲妖也今之合腹牛產於石渠見於石渠石渠固敗昔之兩頭牛雖胎於鄉城乃兵士殺牝牛而得并未發見於鄉城藉曰見在鄉城由官兵見之應敗在官兵何以敗在鄉城乎謂之爲妖殊非通論只可名之曰物異

康藏衛問答

嵩炆於西康遇喇嘛問以西藏人情答曰藏孀娃狡詐過於  
康孀娃余曰康藏人情不同而衛則何如喇嘛曰衛孀娃更  
狡余曰康藏衛之人汝皆知之歟喇嘛曰貿易五十年矣是  
以周知四方人情余曰汝康人乎藏衛人乎喇嘛曰藏人也  
故知藏昔由打箭鑪販茶入藏故知康嗣往亞山販茶入藏  
故知衛余曰亞山在何處汝往販茶而知衛人耶喇嘛曰亞  
山即阿賽密余曰由何路前往喇嘛曰獨吉嶺余曰獨吉嶺  
之外乃印度喇嘛曰然即衛也余曰康地我已游歷藏衛我  
尚不知前藏後藏之外即為衛歟喇嘛曰康藏衛者乃中國

自古稱蕃地之名非蕃地自有此地名也余曰番地無康藏  
衛之名番人何以知康孀娃藏孀娃耶喇嘛曰乃前人相傳  
言漢人以丹達山以東為康丹達山以西為藏故相稱如此  
且有遺書自大番神聖贊普娶中國大唐皇上之女文成公  
主為妻兩家和好迄後中國恐外人侵略番地收印度

明時稱爲

一帶以為蕃之拱衛故蕃人知舊書者皆謂印度

為衛不知者不但不知衛並不知藏與康惟曰邏些

人稱前

札什倫布

稱仍漢人稱後藏也番人

昌都

即察木

滿康

卡即也

而已余曰藏有三拉薩為前藏札什倫布為後藏中藏

在何處喇嘛曰無中藏如漢人稱瞻對有上瞻中瞻下瞻之

分而瞻對只有上下并無中瞻對也又如薩隘漢人稱三巖

有上巖中巖下巖之別而薩隘實只有上下并無中薩隘也

余曰藏有底藏喇嘛曰此漢人因前後藏而稱底藏也余曰

汝言印度又即身毒一帶為衛果有書可考乎喇嘛曰從前達

賴喇嘛有書康熙五十九年準噶爾地名澤旺阿拉布坦率兵

攻藏其書遺失惟工布地名喇嘛尙存有殘書珍之若寶余曰

藏界直接印度否喇嘛曰神聖贊普以下數代部落統一直

接印度噶土人自稱嗣後各部落不遵唐古忒即藏號令如哲

孟雄又名西金界於布魯克巴獨吉嶺又名大吉嶺西廓

界布魯克巴巴爾底薩雜爾西通廓爾喀今已降英巴勒布分中

數部一曰葉金罕一曰喀藏人稱為畢棒子一曰布漁作木朗

與後藏連界洛敏湯與連界阿里由後藏地方乃順羅兼長子朱爾

駐防之策登所準噶爾在西藏拉達克係一大部落與西藏連山

噶爾本落分五區安在補仁達喇嘛盛時會奪取其仁一處以

為藏布魯克巴唐時賜印內屬其地廣數百里產五穀距藏

三千里噶畢距藏三十餘程帕克哩與哲孟連皆獨立

為國也而獨立者亦漸為外人及廓爾喀侵占今之藏非古

之藏也言及此嘆息不置余聞此言始知康藏衛之區域而

華人以康藏衛名蕃地迄今文獻不足無所考証遂以捕風

掠影之談而強斷之謂前藏為危即曰衛其誤已甚據喇嘛

之言思之所謂衛者拱衛藏與康也於衛字有取義似此喇  
嘛卽謂之爲康藏衛之文獻亦可

西康內屬問答

嵩煇述西康事友人問曰君在西康六年番地風俗人情能道其詳康地今雖改流其初自何代內屬可詳說歟余曰考古之事須羣覽史籍然後可知請質諸博雅君子友曰博雅之士僉謂史籍簡略不能詳考君久駐康而土司喇嘛等世代相傳必有遺書可考余曰土司喇嘛語文不通即有遺書繙譯難覓譯音亦難於吻合惟與土司喇嘛相晤之時略詢梗概如康東之打箭鑪確係古之旄牛國諸葛武侯遣將軍郭達造箭於此故以爲名而叩其何時內屬皆影響之談且今之士司大半非酋長之裔如明正咱里單東三土司皆自

言係內地各省人於清有功得授土司世職不知往事也而

考旄牛國內屬係在漢武之時漢武開西南夷於南夷置犍

爲郡邛笮西夷二國君長聞南夷得賞賜多欲請吏上問司馬相

如相如曰邛笮冉音芒冉近蜀易通爲置郡縣愈於南

夷上乃拜相如爲中郎將建節往使因巴蜀更幣物以賂西

夷皆請爲內臣除邊關置一都尉而邛爲西夷今之魚通土

司屬地有邛土人語州之名是邛即魚通乃漢武時內屬者

魚通部落廣大今之明正冷邊沈邊咱里皆在魚通之內魚

通內屬而明正爲四川長河西甯魚通宣慰使司此明代舊名則

巴底巴旺單東卓斯章谷瞻對東科魚科各土司必同時內

屬矣惟羅科野番係宣統三年征伏者康北之德格土司乃土酋之裔因光緒三十四年弟兄爭鬥將遺書散失據土司頭目言內屬中國今已四十七代德格之地接壤西甯部落遼闊德格內屬其小部落之白利孔撒麻書靈葱納奪高日春科各土司必同時歸化矣惟俄洛色達兩處野番係宣統三年投誠者康南之巴塘爲古之白狼國後漢和帝時旄牛徼外白狼獯薄蠻夷內屬而裏塘毛丫毛茂丫曲登崇喜在巴塘之東距旄牛徼近裏塘雖屬青海其同巴塘內屬無疑即謂裏塘屬青海而未內屬唐開元天寶之際以兵戍青海青海既內屬而裏塘可知江卡貢覺之屬青海者亦與焉矣

桑昂又名桑昂曲宗及雜瑜或云皆係野番之地歸化或云係青海屬若屬青海亦必同青海內屬惟三巖又名薩係野番宣統二年邊務大臣趙爾豐剿伏者康西之乍丫察木多八宿類伍齊四部落原係獨立以僧爲汗番人稱之名曰呼圖克

圖

四呼圖克圖內屬時代雖不可考而察木多即昌都爲古康地又名喀木明時稱爲昌都衛

清之康

熙五十八年頒給四呼圖克圖印信至洛隆宗碩搬多邊壩

又名送隆宗

三部落原屬康地丹達山一帶尙有察木多地土即

此可知爲康土人云其初亦各有呼圖克圖管理并不屬唐

古忒

原名圖伯特元明時稱烏斯藏

康熙五十八年準噶爾佔據唐古忒并

派陀陀宰桑帶兵佔邊壩碩搬多洛隆宗故三處土人均投



準噶爾嗣定西將軍噶爾弼統領川兵由打箭鑪巴塘昌都前進準噶爾之兵逃遁洛碩邊三部落投誠定西將軍雍正四年會勘疆界乃將類伍齊洛隆宗碩搬多賞給達賴喇嘛而邊壩一部先被唐古忒陰謀占去宣統二年唐古忒以類伍齊等四處番人阻川兵入藏邊務大臣趙爾豐乃用兵攻之收回地土是乍丫洛隆宗等八部落內屬時代不在後漢和帝年同白狼等一時即在唐初貞觀間吐蕃即禿髮贊普為妻之際否則在唐開元天寶遣兵戍青海之年至三十九族昔屬青海原係百餘族後併為七十九族雍正九年分三

十九族與駐藏夷情章京管理其初係同青海內屬者波密一部落雖為漢人苗裔從未內屬乾隆五十餘年因西藏濟隴呼圖克圖轉世於下波密故下波密歸濟隴呼圖克圖派人管理仍未歸藏宣統元年冬來投邊務大臣宣統二年抗拒藏兵駐藏大臣添兵并請邊務大臣派兵會同剿伏是為波密歸化之始此西康全部分內屬之大概也自愧謏陋於番人內屬未能週知底蘊尙祈博雅君子以確有考據者賜教為幸

按印笮兩國唐杜佑通典曰印都漢時自滇以北君長十數印都最大其外西曰桐師以東北至葉榆名為嵩崑明

地方數千里無君長焉但隨畜遷徙無常其土地平原有  
稻田俗多游蕩善謳歌略與牂牁類笮都者漢時自越嶲  
以東北君長以數十徙笮都最大武帝開以爲笮都縣天  
漢四年併蜀爲西部置兩都尉一居旄牛主徼外夷一居  
青衣主漢人後漢明帝永平中益州刺史朱輔慷慨有大  
畧宣示漢德威懷遠夷自汶山以西前世所不至正朔所  
未加白狼名國槃木名國唐菽名國等百餘國戶口百三十  
餘萬舉踵奉貢稱爲臣僕和帝永元十二年旄牛徼外白  
狼獠薄蠻夷王唐紹等遂率種十七萬戶口內屬

又按笮都漢武帝建元六年定西南夷以笮都爲沈黎郡

兼置旄牛縣天漢四年省沈黎以旄牛屬蜀郡爲西部都  
尉治是以笮更名沈黎也今之四川清溪縣爲古黎郡所  
屬可見清溪越嶲一帶皆爲笮也或曰今之大相嶺乃古  
之邛夔山卽九折阪爲邛笮交界之地是邛夔山以西南  
爲笮以西北爲邛今魚通有邛州之名信而有徵也今之  
打箭鑪爲古旄牛國漢武帝建元六年置旄牛縣此爲打  
箭鑪內屬之始今之巴塘爲古白狼國後漢明帝永平十  
七年同百餘國奉貢可見古之國小如今之魚科東科春  
科各土司所屬人民只百餘戶在古時亦爲一國而百餘  
國僅載白狼槃木之名餘皆不可考白狼國王唐菽且作

詩三章歌頌漢德此巴塘內屬之始漢和帝永元十二年  
白狼獾薄蠻夷王唐縉等率種十七萬戶口內屬此巴塘  
內屬之二次也至謂率種十七萬戶口謬矣非白狼獾薄  
蠻夷王以少報多卽係繙譯之誤否則史家紀載手恢張  
失實也今以西康全部戶口計尙不及十萬豈一二部  
落有十七萬戶口哉縱謂古之戶口多今之戶口少相去  
何至如此之甚耶

西康建省記書後

昔馬伏波聚米爲山指畫隴上形勢識者曰虜在吾目中矣  
李贊皇節度西川作籌邊樓日召老於軍旅習邊事者討論  
其中以知險隘遠近皆若親歷繇是南安六詔西撫吐蕃偉  
哉邊謀非洞燭其情事不爲功矣蜀藏間之有康域其雄據  
中原之上游而扼拊川滇之吭背關懷大局者咸欲深切研  
究已非一日第近今之康已非復曩時之康緣昔狹而今廣  
昔僻而今衝昔夷而今漢蓋自漢官初置而康域之大勢一  
變自外人涎窺而康域之大勢一變自全體改流而康域之  
大勢又一變彼其新開之天地既爲數千年來所未嘗開斯

五十

其人情風俗與夫更化善治一切方畧自爲數百年前撰述  
家所未嘗言此西藏圖考西藏通覽諸書所爲足以徵藏事  
不足以察邊情而西康志之有待人爲殊汲汲也 傅君華  
峰以介子雄豪兼上馬殺賊下馬作露布之才從事西康歷  
有年所今歲秋景伊得相聚與談治邊之略黻黻娓娓能舉  
大要因勗其爲此間志乘以爲吾蜀邊籌即以爲國防大計  
傅君因出其所嘗之艱難險阻以成爲政治文章名之曰記  
凡三卷甫匝月成景伊卽隨其所出之書而隨以付印嗟乎  
英雄所爲大半補乾坤之缺憾吾蜀吾政府今日者需此邊  
才望若霖雨而渺若山河傅君此書之成足以補帷幄之運

籌足以補方乘之闕略卽謂此書爲馬伏波之山也可爲李  
贊皇之樓也可

中華民國元年九月中浣 巴縣胡景伊敬識

頁	數	行	數	字	數	錯	誤	訂	正
第十頁	第七行	第一字下	乘馬欲欲乘馬						
第十一頁	第十一行	第五字下	善						養
第十三頁	第十三行	第十六字下	請						汝
第十六頁	第九行	第十六字下	落一字其						請
第十七頁	第三行	第一字上	落一字寺						
第十九頁	第一行	第一字上	落一字將						
第二十四頁	第九行	第一字上	落一字三						
第三十三頁	第四行	第五字下	魚通河西						河西甯魚通
第三十三頁	第四行	第十八字下	河						西長河
第三十三頁	第十二行	第五字下	洶						湧
第三十六頁	第三行	第五字下	南						北

頁	數	行	數	字	數	錯	誤	訂	正
第四十四頁	第三行	第六字下	賞						時
第四十四頁	第四行	第八字下	期						朝
第五十二頁	第五行	第一字下	工						洋
第五十三頁	第十六行	第十字下	五						十
第五十七頁	第十五行	第六字下	以						已
第五十九頁	第十五行	第十八字	落一字茲						

頁	數	行	數	字	數	錯	誤	訂	正
第二頁	第二十行			第二字下	餘				皆其二江
第三頁	第十二行			第九字下	人	頭	頭		人
第三頁	第十五行		<small>小註第二行第十二字下</small>	買			賣		
第八頁	第三行			第十七字	丁		辛		
第九頁	第十一行		<small>小註第二行第八字下</small>	二			三		
第九頁	第十四行		<small>小註第二行第十七字下</small>	刊			判		
第二十頁	第七行		<small>小註第二行第四字下</small>	襄			襄		
第二十一頁	第九行			第三字下	落一字	張			
第二十二頁	第十二行			第一字下	毫		毫		
第二十三頁	第一行			第四字下	毫		毫		
第二十三頁	第一行			第十三字下	賑		賑		

表	誤	勘
	第二十九頁	第五行
	第三十五頁	第九行
	第三十七頁	第十六行
	第四十五頁	第二十行
	第四十六頁	第九行
	第四十八頁	第十一行
	第五十三頁	第八行
	第五十三頁	第十三行

  

第五行	第九字下	運	多
第九行	第三字下	落一字	關
第十六行	第三字下	以	有
第二十行	第一字		有
第九行	第五字	衣	為
第十一行	第十八字下	帶	為
第八行	第十七字下	幟	達
第十三行	第三字下	落一字	人

